

福建通志

第陸拾柒冊
列傳

K295.7

1

福建列傳卷二十六

明十

黃鳳翔字鳴周晉江人隆慶戊辰進士第二人泉中科第不乏而明朝及第自鳳翔始授翰林編修奉命教內書堂內書堂者授小內使讀書之堂也故事皆翰林資深者充之至是以委新授翰林鳳翔與狀元修撰羅萬化探花編修趙志臯探古內侍之可爲法者積成卷帙授之俾讀誦萬曆初與修世宗實錄實錄成進修撰纂修會典管理誥勅充經筵官五年丁丑同考會試張居正奪情起復朝論不滿吉水鄒元標起家新進士上疏彈劾居正恚甚取中旨杖之鳳翔不平訟言於朝曰鄒公新進烈烈如是胡可死之屬其門生之爲鄒鄉人者調護多方元標竟無恙及居正一子會試示意鳳翔再與同考鳳翔固辭之使同官代而江陵子遂中選自是權要貴人皆爲其子營圖中選又有先容於鳳翔者方發口鳳翔左右視應以宅辭遂罷癸未陞右諭德掌南京翰林院事甲申陞南國子監祭酒

念母歸養戊子起祭酒己丑陞禮部右侍郎兼翰林院侍讀學士充經筵講官疏論時政以用人理財之說進其疏曰頃者狡虜陸梁盤桓內地捐軍覆將遠邇震驚明明天子猶然安晏臣蒙恩列在班行衣繡肉食私自耻詎謂陛下誠宜揚厲憂勤屏游宴御朝講圖修攘天下承平久矣行伍空虛帑藏匱乏臣謂用人理財最急耳宋臣有言平居無極言敢諫之臣則臨難無敵愾敢死之士故軍中韓范西賊膽寒彼其當初皆極言敢諫者也吏部員外郎鄒元標與其他建言謫外諸臣如潘士藻孫如法皆其人也元標直聲勁節業受上知頃銓司業擬召用而聖意頓改于前士藻如法諸臣亦擬量移而章疏中寢夫以諸臣狂懇薄斥猶且不被收錄復奚望夫盧洪春李沂諸臣之獲譴獨重跽伏田畝者也平居靡爵祿臨難不全軀保妻子乎陛下方與輔臣面商邊事庶幾趨充國諸葛亮其人而何可不預蓄之也臣之爲陛下言用人也願陛下不以爲迂昔宋二祖欲積綠帛二百萬匹易胡人首宋太宗移內藏上供物爲用兵贍給之資二

君非堯舜而猶若是天子不言有無諸侯不言多寡今戶部二十萬之歲進既非舊額積爲常供屢經執奏未蒙俞允額外之輸貯諸內藏而經費資予外庭莫知如之何保無溢也臣見都城內外宮廟寺觀或建或修金碧堂宇壯麗熒煌詢諸道路皆曰內帑所捐而遠方梵刹之供奉歲時燕醮之費用亦復絡繹頻仍與其厚費冥漠之鬼神孰若蠲輸子遺之民命今東南財力已竭西北邊務方殷眞國民交病之日反裘負薪之景宋之藝祖太宗有何難逮出內帑之蓄以富軍市之資則養士募兵充然而有餘惟在需發德音特賜停止則中外之權聲雷動主計之常格大破臣之爲陛下言理財也願陛下不以爲狂臣起家詞林濫躋卿貳靡有尺寸上答崇高偶觸時艱謬陳膚見皆陛下之耳熟而諸臣之口贅願謂臺省言之不聽則大臣言之一人言之不聽則人人言之亦謂天下大計無出此也疏入報聞時皇太子未立中外屬望而上意又欲國本之定出自君父宣諭閣臣册立之典且需明歲第每使外庭知也未幾禮部禮部尙書于

慎行侍郎李長春及鳳翔遂上明春册立之儀上怒曰朕密諭也而又宣之鳳翔與慎行長春並奪俸三月廷臣不敢有言而鳳翔復疏諍之疏入不報遂上疏乞休壬辰起禮部左侍郎癸巳改吏部俱兼官如故己升南禮部尚書復疏辭上以鳳翔素有清望不許再請許之甲午復起尚書復疏辭上復以鳳翔清望不許再上准以新銜在籍調用四十二年甲寅鳳翔卒計聞上未及復有旨起為南禮部尚書已知鳳翔歿予祭二壇仍加一壇造墳安葬鳳翔每歲讀一書輒有論著為文爾雅深醇所著有田亭草若干卷又編輯嘉靖大政記嘉靖大政編年錄泉州府志天啟初賜謚文簡子淳中潤中

淳中字嗣真以廕授南京前府都事歷遷至柳州知府為政廉平以蜚語去官父老攀轅不忍釋

潤中字嗣雨宗禎丁丑進士授刑部主事遷禮部員外郎有詔追贈皇五子孺孝悼靈王通元顯應真君一時朝議譁然潤中力爭言從來但有王

號無道號事乃寢出爲河南提學副使陞廣東參政備兵惠潮時京師已陷巡撫程珦遁其麾下將練克等劫搢紳將爲變潤中立制之乃止又有大帥某踞潮州城日以誅求爲事潤中勸以急宜勦寇勿擾民帥感動潮民乃安戶戶祝之以病告歸中途爲流賊所獲括筐篋僅二硯賊訝之既知爲潤中曰早知是黃觀察何敢爾耶請護以歸潤中揮之使去歸後著書以老

明外史黃鳳翔傳鄒公存真集閩書明史

某明元字可鳴同安人孝友喜讀書隆慶戊辰進士知石埭縣時政尙嚴肅明元獨寬易爲理遷南京刑部主事有百戶者張居正鄉人道殺人主者欲庇之明元竟抵之法居正父過南京傾都出謁明元獨不往出爲南安知府巡行勸課嚴禁溺女大庾學自天順時并郡學中道源書院亦爲居正所廢明元入覲具疏請復之皆允行遷貴州按察副使諸徭怙亂明元潛畫方略酋相次受縛因建邑浚河徙民規畫甚具進廣西參政李熙字穆之晉江人隆慶戊辰進士選庶吉士除兵科給事中乞錄用世

示時言事諸臣請祭清從祀孔廟糾中官馮保巨奸宜斥逐旁及戎政互
市賑卹阜財諸疏皆有建白高拱當國欲令臺省掎擊閣黨盡逐先朝舊
時左右同列有受指者以語熙熙不可已而拱竟去位受指者幾陷不測
同官始服已張居正代拱偵熙與拱忤諷爲排不附已者熙復不應久之
疏論譚綸劉顯及黔國公沐紹勛爲居正所擠謫南豐縣丞既至棲白鹿
洞講學人士彬彬嚮風遷寧國知縣邑有累年不決疑獄熙察其冤釋之
擢南京刑部主事出知高州府其地徭獍雜處寇賊充斥有司討之不能
克熙示以恩信散其脅從境內肅然遷廣西按察副使府江有木鹽二稅
歲可得羨帑千熙盡卻之付郡縣貯庫以備他需積勞成疾致仕歸道陞
雲南參政舟次惠州卒

王任重字尹卿晉江人隆慶戊辰進士除廣州推官遷柳州同知有搢紳
張某者居顯位其子弟橫行郡中至乘輿馬與守令爭道任重執而禁之
肅發諸不法狀郡中肅然遂擢和其府和山賊煽動遣卒平之調貴陽府

時居正當國郵禁方嚴任重之貴陽猶循舊例發傳有希居正意者摘
人以明奉法任重與馬謫金華推官吏部尙書嚴清知其廉潔居無何轉
揚州同知擢知曲靖府土酋繼榮者故羅雄知州外奉郡約束實四出劫
掠任重白當道集兵勦之擒繼榮遂改爲羅平州鑄印設流官焉擢雲南
按察副使治瀾滄地近麓川多夷患任重積粟蒐卒夷人帖然擢陝西行
大僕少卿尋遷雲南參政會討猛酋任重職督饗兼率偏師協力犄角遂
伴猛酋收其地設三縣置吏如羅平再遷山東按察使兼參議專理漕運
時河決黃堦呂梁皆竭漕舟萬艘集黃河中任重濬淺滯力率挽克如期
抵京帝念其勞晉太僕寺卿致仕歸杜門謝客泉州知府竇子偁慕之造
門請益適有隱田法當沒入欲以遺任重堅辭之所居鄉民例輸福全所
倉糧官吏武弁因緣爲奸轉運守待動至破產任重爲條利害於當事盡
革宿弊卒後鄉人立祠祀之任重少時卽有志聖賢之學守曲靖時適李
材爲副使遂以所學互相衍繹踐履益眞與王用汲俱晉江南鄙人爲諸

生出入相隨同舉進士其賢行又相類鄉人謂之二王

王用汲字明受晉江人爲諸生時郡被倭客兵橫市中會御史按部至用汲投轅言狀知府曰此何與諸生事用汲曰范希文秀才時以天下爲已任矧鄉井之禍乃不關諸生耶第隆慶戊辰進士授淮安推官署邳州知州河工方劇河道都御史皆倚辦用汲用汲程工酬直猶胥無得漁獵稍遷常德同知入爲戶部員外郎萬曆六年首輔張居正歸葬其親湖廣諸司畢會巡按御史趙應元獨不往居正嫌之及應元事竣得代卽以病請僉都御史王篆者居正客也素憾應元且迎合居正意屬都御史陳爝劾應元規避遂除名用汲不勝憤乃上言御史應元以不會葬得罪輔臣遂爲都御史爝所論坐託疾欺罔削籍臣竊恨之夫疾病人所時有今在廷大小諸臣曾以疾請者何限若以爝言准之則諸臣皆懷欺之甚不容一日立乎其位矣且無論諸臣卽爝當世宗朝亦養病十餘年後黃緣攀附引要津以退爲進宜莫如爝已則行之而反以責人何以服天下夫專

有其貌則是而意則非者如昨歲星變考察將以弭災也而所摧抑者半不附宰臣之人如翰林習孔教則以鄒元標之故禮部張程則以劉臺之故刑部浮蹤獨多於他部則以艾穆沈思孝而推戈考後劣轉趙志皋又以吳中行趙用賢而遷怒蓋能得輔臣之心則雖經論列之潘晟且得以不次蒙恩苟失輔臣之心則雖素質才名之張岳難免以不及論調臣不意陛下省災塞咎之舉僅爲宰臣酬恩報怨之私凡附宰臣者亦各藉以酬其私可不爲太息哉應元之斥已奉明旨非一介賤臣所能回天臣不避斧鉞特爲是言者欲使權臣聞之謂天下猶有不可威劫之士或稍斂戢於將來是臣所以忠陛下之心也疏入居正大怒欲下獄廷杖會次輔呂調陽在告張四維擬削用汲籍帝從之居正以罪輕移怒四維厲色待之者累日方用汲拜疏時尙書殷正茂召責之曰斯事舉朝耐之爾何獨乃爾用汲曰唐之佛骨宋之和議舉朝可耐韓愈胡銓不能耐士固各有志也正茂默然用汲歸屏居郊外布衣授徒不踐城市居正死起補刑部

未上擢廣東僉事尋召爲尙寶卿進大理少卿每朝廷有大議常引諫力
爭不少撓尋遷順天府尹南京右副都御史總督操江南京多中貴請託
顧獨揮用汲干謁爲衰止會勦太湖劇盜殲其魁就遷兵部侍郎改吏部
晉刑部尙書以病乞歸用汲爲人剛正遇事敢爲自尹京後累遷皆在南
以疆直故也卒贈太子太保諡恭質以上道光舊志

蔡貴易字通通一字道生同安人隆慶戊辰進士知江都縣未赴改崇德
崇德浙西孔道軸輻冠蓋相接貴易悉罷諸供應之擾民者民輸粟京師
奸習猶萌意爲高下貴易差產授役釐毫不爽人詫爲神明復包角堰以
捍海潮歲連稔舍山巨盜楊雷潘榜者糾衆橫行撫按謀遣將貴易曰無
庸乃用開擒其魁餘黨解散擢南京戶部陝西司主事有徽州商素感恩
饋金四百退贖卻之商人立四知亭記馬陝西司董錦衣入倉米鹽弊竇
不可勝數貴易坐稅稊塵垢中雖盛暑隆寒不少避吏不能爲奸進員外郎
遷禮部郎中出知寧波府貴易爲大學士余有丁門下士有丁寧波人貽

書戒其家曰是其報我不以私毋庸私覬也貴易至造請士大失問民疾苦其或通關說卽詞色無所假時有丁議開海外金塘大榭二山謂可墾腴田二萬畝佐軍興貴易曰此國初所徙地也役烝黔而資巨室何利焉事遂寢貴易吏事精敏雖千人之衆數年之久凡一見皆記然性宏厚不屑鈎距去太甚而已先是諸衛所賂結府胥移借軍儲至數千金貴易悉置於法饑蠹一清海上漁商二稅舊輸郡帑貴易貯之鄞定海著爲令居五年遷貴州按察副使歷參議水西土酋安國亨致餽卻之旨是國亨頹首受約束惟謹進浙江按察使民間之喜曰是故浙中良守也會湖州學士董玘祭酒范應期獄起告訐者蝟集貴易曰是無賴子易煽安足聽一時撫按方以搏擊爲風裁知貴易不爲動則徑下監司郡守已玘家盡破應期投纆死事聞帝震怒當事者咸獲重譴人始服其持重會入計臺省構其短鐫一秩遂歸子獻巨字體國萬應己丑進士授刑部主事遷南京吏部文選郎中改北時帝久不視朝獻臣疏請早定國儲己又疏請福藩

之國鄭貴妃志甚夜發內使執獻臣旦入對據傳典力爭帝嘉其直旋出
為南畿參議遷湖廣按察使罷歸百姓為立祠尋起為浙江按察副使天
啓時擢南京太常卿為魏瑄所劾削籍歸邑有海豐莊田數百畝其上為
朱埭決則田皆沒嘗屢築屢壞獻臣慨然任其役第田為三等以次出資
凡築石岸千九百八十餘丈於是歲以有收鄉人德之 閩書

蔡應科字思誠龍溪人父結性醇慈讀書山舍有村女投宿叱去之應科
隆慶戊辰進士除瑞州推官遷戶部主事同舍郎王用汲疏論張居正斥
為民應科獨往餞之應郎中出知廣西府崇儒愛士獄無冤民士曾羅雄
內訌應科登陴誓衆設伏得賊釋其繫密使齎蠟書遺曾謀三以開之謀
主既去酋失助遂被俘遷貴州按察副使進陝西參政時礦使方張發冢
鎔金者相踵應科力爭之先倩中使按視虛實傳言者有好狀即遠治之
擢廣東按察使就遷左右布政使萬曆三十五年以右副都御史巡撫廣
西首禁土酋毋得入鎮城文武將吏毋得聽細人言驚擾其馴服者手為

文告示之酋盡感泣安南寇蹂欽州兩廣督臣大索賊令廣西犄角應
誓諸將吏勿妄殺一人招降多者論功視克捷乃命多爲表幟建表夷村
之前曰善村建幟夷隘之口曰招降得夷人毋困之過夷聚落毋擾動擒
獲招撫凡萬餘人應科皆戒勿殺自軍興以至凱旋竟不血刃雲南夷酋
酋聚衆倡亂撫臣奉旨往征乞餉金廣東西以五萬旨已下矣應科上言
雲南之求助於兩廣者坐窘餉也兩廣之不能爲雲南助者坐餉窘也溯
厥所繇則由國稅之未停罷也蓋未稅之前則以稅爲餉既稅之後則移
餉爲稅而餉缺勢必取公帑矣公帑匱勢必漸去兵兵少勢必生戎心召
外患矣竊謂今日陛下倘免雲南之稅何須求助於廣東西倘免廣東西
之稅亦何至莫助於雲南此特在九重之上言之寬耳三殿重建貴州
當採運黔撫復以困匱爲言工部請責廣西協濟貴州木價銀十萬以五
年爲期應科復言陛下嘗念貴州貧免貴州稅矣嘗念遼東邊撤稅使以
遼稅充遼餉矣廣西與貴州等貧而宗祿兵餉之匱乏爲甚與遼東等邊

而物力遜之陛下何不以念遠念貴者念西人也帝又欲以四川稅使來兼廣西稅應科又陳其可虞者二不便者三事已西兵持廣東鹽爲餉東人欲增課應科爭之東人稅及西人米又爭之四十一年進南京戶部右侍郎兼右僉都御史總督漕儲累辭不允四十二年遷南京都察院右都御史上疏累言今衆情所仰望者有第一大事則皇子之講學皇長孫之出閣也有第一善事則礦稅之罷免也內帑之給發也有第一急事則科道官考選之賜允與舊科道之允請允差也有第一切要事則章奏之無留中及中旨之無徑出也又嘗上三事曰疏詞戒冗晦稱謂戒沿襲論列戒深刻又請定官詳之格列賢否之實欲於考論之下分列五款曰操守曰才幹曰心術曰年曰貌母炫支詞每飾遁語使考人者不爲皮傅考於人者不爲膚受據考人考於人以觀人者不爲影捉用以存注考之舊章冀以得賢才之實用並見嘉納尋卒官贈太子少保賜祭葬

戴耀字德輝一字鳳奇長泰人時宗曾孫隆慶戊辰進士除新建知縣

官至副都御史巡撫廣西

府志載平岑溪蠻考廣東前事略岑溪蠻之叛在萬曆初總制凌雲翼降之而耀撫廣西在二

十三年於進兵部侍郎總督兩廣軍務交趾賊翁富兩犯欽州耀前督安

南都統黎維新後督副將楊應春討平之復平府江徭解川湖急難南黎

反側者帝嘉其功進秩兵部尚書督粵凡十三年牧養安輯蠻夷帖服中

使探珠廣東為民患耀極言其不便疏留中耀清正自持多不得要人歡

適交趾莫酋同楊扶安等作亂耀謂宜勿用師惟檄維新勒兵討之兵未

交要人喉言者劾失計遂坐解職既而賊竟就擒天啓初錄舊勳復原官

耀貌魁梧美髭性宏毅慈祥在制府久未嘗輕戮一人家居時獄有重囚

潛結客兵為內應夜率其黨越徃殺知縣耀聞變負劍入縣戒民勿動急

閉市門柵屹坐指揮盡擒之卒年八十

田一儁字德萬大田人隆慶戊辰會試第一選庶吉士授編修奉使淮藩

不受餽絜進修撰遷侍講萬曆五年吳中行行政張居正奪情趙用賢等繼

之居正怒不測一儁偕侍講趙志皋修撰沈懋學等疏救格不入乃會王

錫爵等詣居正所爲廷杖者解居正默不應則昌言責以殉常之義且曰
天地鬼神其可欺乎天下萬世之口可盡籍乎居正矚之未幾志臯等被
逐一僞先請告歸獲免居正沒起故官修大明會典數月復引疾歸久之
起攝南京國子監事居二年召爲北祭酒擢禮部侍郎兼侍讀學士掌翰
林院辭疾歸未行卒贈禮部尚書一僞親身嚴苦然不欲以潔目標厯宦
二十餘年莫知其貧者迨病篤諸門人請臥榻說所食用率糲糲疏布一
蕭然寒士也及卒董其昌爲庶吉士請假走數千里護其喪歸葬以上道
裴應章字元閻清流人隆慶戊辰進士授行人萬曆初兩奉使德晉二府
當陛見奏對進止有度帝屬目焉擢吏科給事中嘗使遼目擊邊左險要
乃畫善後策六事條上之悉見嘉納遷兵科都給事中值西陲數入犯應
章上制馭策悉中機宜劾罷無臣之棄師者憲臣之昏庸與勳臣之不法
將臣之縱賊朕卒者風采肅然張居正当國嘗建議三歲一遣大臣行邊
應章言靡費當罷大璫馮保欲取太僕寺馬三千匹應章執勿予中貴人

許大帥方議行勸應章力沮之皆與居正左然居正心折應章不爲忤也
遷太僕少卿居正私人王篆爲吏部侍郎欲招致之不應久之不遷所上
給關防嚴舉劾戒侵剋嚴寄養諸事皆得旨著爲令遷太常少卿初太祖
嘗定壽春諸王及妃與功臣胡大海等俱侑享四祖後四祖祫而侑享如
故應章言廟中列后在上異姓之臣禮宜別嫌且至尊拜俯於下諸臣之
靈亦必不安乃命改祀功臣西廡遣官分獻鄖陽卒辱撫臣將爲亂廷議
以應章往未至先激諭以禍福語甚切至亂卒乃自縛迎數百里外應章
斬其魁餘無所問闔境晏如還爲戶部侍郎遷吏部侍郎妖書事起詞連
張位及右都御史徐作禮部侍郎劉楚先等應章力爲解不聽既而奪楚
先等官應章復論救言以誹語中人非盛世事帝不悅尋引疾歸起南京
工部尙書屢疏辭不允乃強赴立法疏錢幣諫採鷹架木糾中貴人濫索
省水衡費甚鉅未幾又乞歸復起南京吏部尙書堅卧不起虛以待者三
年卒贈太子少保謚恭靖

大澗山房集

張宓字仲初惠安人以父任授前軍都事轉右軍經歷調宗人府諸貴胃
官長安者率鮮衣怒馬相並耀時時過從酒食爲歡宓獨衣故衣乘羸馬
入公署歸則扃戶讀書一蒼頭給爨蕭然寒素士也隆慶中知慶遠府府
隸南丹東蘭那地三土州守往往受其酋貨物與爲市宓謝絕之已而三
土酋伏謁階下纒纒庭實宓遠麾之酋度不能嘗宓所欲竟以侵地歸一
酋黃緣進服色業得上官俞矣第借郡贖取或事宓數罷之酋兵多虛糜
歲饒宓詳覈名籍汰濫冒所省數千緡府江之役上西赴徵詭所過騷然
獨至宓境無敢譁者已謁臺使道潯州一夕卒喪歸自粵發救篋獨有故
時衣慶遠人思而祠之

明書

鄭夢禎字開甫福清人隆慶庚午舉人除寧晉教諭擢南京國子助教遷
知蘄州荆府護衛地入民家歲久王忽語夢禎欲得前地夢禎曰藩衛創
矣責地何爲必復之且勅諸子家非守臣所敢任也王不懌以危語動之
夢禎正色曰守臣爲地方計耳何知禍福徑趨出久之王謂知惡少構民

家欲藉藩府以逞乃悔謝夢禎益善遇之巨璫陳奉監稅楚中擅威福郡
守而下皆伏謁夢禎獨與抗禮奉議斬稅夢禎曰斬濱海瘠壤商賈不集
何稅之有索庫金夢禎曰斬無積儲股民膏以博中貴人斬守實不能奉
大怒謾罵去斬民胡大裕所居山不數畝廬其麓而葬其巔奉欲鑿之夢
禎再爲牘白上官爭之強奉又使其黨錦衣王某至開山礦且求賂語侵
夢禎夢禎忿起曰汝輩豈以吾重去官耶遂乞休斬民羣起毆王某王逃
歸以愬奉奉積前後忿劾夢禎謫貴州按察司經歷夢禎去斬民皆號哭
送數百里奉使人尾其後將甘心焉以斬民擁護得免遂歸未幾卒訃聞
斬人爲罷市巷哭夢禎草書學懷素大得神解在寧晉時待諸生有恩俸
入悉以予貧者不給則畀以書使售之未仕時與諸生陳益相善益死奔
馬下市人無識者夢禎抱而哭之曰此吾友陳益也益目不瞑夢禎曰於
我殯乃瞑

薛夢雷字汝奮一字鳴宇福清人隆慶辛未進士知江山縣清賦息訟察

奸入秋毫未期月聲績爲兩浙冠邑豪有恃貴人力奪民邱壠者夢雷法繩之巡按御史爲宛轉言不聽明興江山有三賢令夢雷其一也徵入爲御史視盛厰奏劾巨璫失張居正意出爲廣東按察司僉事轉布政司參議殲夷寇破蜚賊平大泥劇盜蘇觀陞葉宗權等以其暇築廉州城三受上賞巨璫張誠弟橫行海上有司莫敢問夢雷杖殺之大吏欲以珠賂權貴示意於夢雷不能得則投意盜魁李茂纂取夢雷亟捕之而逸珠竟不可得也再轉浙江副使琉球貢船失道官兵屠之俘二十七人歸誣以賊同官欲借爲功議殺矣夢雷道遇訝其貌不類問之果琉球貢船也亟白制府釋諸俘曠使至金華人情洵懼巡撫劉天霖謂非夢雷不能敢特疏請加參政彈壓其地浙東西賴以無事擢雲南按察使歷左右布政稅璫楊榮偃待諸司日誘人告捕索寶富者中以危法當事咸惴惴獨夢雷每事裁抑之嘗與璫飲人皆防其毒夢雷慷慨浮白不設猜防璫以此服之繼阿克者其先武定酋也搆諸夷謀亂武定守逃會城委其印於藩司

隨以兵聲言武定我故土也予我印則罷兵不予且虔而城都人淘淘自
鎮臣而下皆恒懼請於巡撫都御史陳用賓姑予印以紓禍用兵以為然
夢雷獨爭之曰吾戮力固守援兵且集賊何能為卽不然守死正也何計
其他語慷慨激厲聞者皆色變右布政某趨進謂用賓曰事亟矣毋為妄
言撓遂予印後用賓坐逮吏部難其代滇人在京師者誦言予我薛公遂
擢右副都御史巡撫其地無何言者以予印罪用賓連及夢雷奉朝命聽
勘比勘夢雷枉大白遽卒夢雷博大雍容洞達機變然性耿介不通朝貴
書其逮勘亦由之

林應訓字子啟懷安人隆慶辛未進士知南昌縣擢南京御史先是嘉靖
中蘇松常鎮四郡洪水為患又河衝泗州幾陷陵寢至是廷臣推可使治
水者命應訓應訓躬親胼胝於常州濬孟瀆於鎮江濬漣湖於蘇州吳江
濬長橋起龐山湖達吳家港於昆山濬橫塘起歸家墳小石橋至本塘於
松江濬吳淞江大川六支流四十七港濱九十一作水利圩圍積五載而

功成江南水患以息水利以廣遷南尚寶寺卿後奉旨建崇德報功坊於郡城西扁曰功侔四載

陳用賓字道亨晉江人隆慶辛未進士知長洲縣入爲御史巡鹽河東時久雨鹽課將虧禱於中條山雨卽止又苦無南風鹽不能凝結復禱輒應鹽課入倍於常時改巡按淮揚兩郡江漕多滯吏陰操郡推官權每推官遣刺州縣事則迎入其家卑官富人奔走盈門不行賄立中以禍民甚苦之用賓密令郡縣蹤跡得鳳陽吏孫蘭者爲四郡巨魁置之法其風乃息尋疏薦一謫官忤張居正意出爲四川參議歷擢至右僉都御史巡撫雲南甫下車卽察形勢請設蠻哈守備雲南舊貢金四千兩科臣王德完乞停止奉旨反加一千兩用賓請仍舊額疏極劄竟不報緬夷召猛別猛養諸夷分道入寇據蠻莫用賓授策於參將王一麟等先擊之先後斬獲一百二十五人賊始退屬夷多俺父子引緬兵至隴川又勾丙測兵入掠用賓用閒諜檄暹羅國襲緬後以率制之又授策於參將吳顯忠令木邦

宣慰罕致爲朝廷宣力木邦聽命陽發兵助多俺遂於馬上刺死其子多
亨又殺俺及其子多洪曩面以首來獻三宣乃安戢事聞勅獎賜金幣用
賓念金騰永昌間屢被緬患乃議於銅壁諸處設險屯守創建八關八十
二堡募兵民屯田其中歲收粟九千餘石省轉運費二十四年緬復糾猛
密思仁丙測猛養諸夷欲吞蠻莫以窺思化用賓遣參將顯忠守備張光
允等發兵同思化往援緬知有備遁走追至怕黨思仁丙測迎戰大敗之
斬丙測生擒緬賊十六人斬首數十級獲戰象三馬數十匹提擱晉秩右
副都御史大侯州土官奉赦世守其地其族奉學分管雲夢等十三寨謀
奪州印連結順寧府土舍猛廷瑞與兵攻赦焚州治用賓疏欲令廷瑞執
學自贖不從則以兵臨之廷議許用賓便宜行事乃調兵遣顯忠及都司
麻鎮先攻學破其數寨學走歸廷瑞乃令顯忠鎮軍分道並進廷瑞計窮
乃斬學首獻之然恃字宗兵來援負固不出顯忠襲字宗兵於沙麻破之
得鄉導由中步入二晝夜抵順寧圍廷瑞於洛黨寨獲之順寧平乃改土

爲流設知府而赦則仍知州改號雲州設州同與之分理無何十三寨復
叛又討平之遷右都御史兼兵部侍郎巡撫如故蔭一子錦衣百戶世襲
稅監楊榮使人通蠻莫道欲開寶井緬阿瓦遂執以爲詞使其曾孫罕擁
衆十萬犯蠻莫稱漢使令我殺思正以通蠻莫路吾爲天朝除害用寶上
疏言蠻莫三宣之藩離三宣騰永之垣堦全滇之禍皆自開採啓之欲覲
寶井則藩籬必撤欲保藩籬則採買當罷語甚切直帝不能用榮欲羅織
立威廣愛奸民李成林等告詞誣執把總尹希舜富民郭之翰等加以嚴
刑索取黃金動至千兩禍延數州縣將激變用寶上疏歷數榮罪並及其
謀死李提舉史通判龔同知等事請漢之法而速罷曠說疏留中榮益恣
肆無忌拷死指揮梁棟於是衛官賀世勳韓光大及棟子阜門等乘小民
激變各執刀劍排牆入殺榮焚之用寶具疏言激變之因分別情罪以上
止誅世勳及亂民四人復用用寶議令四川稅使邱乘雲兼攝雲南事雲
南復安然帝以用寶不保全稅使者亦少哀用寶撫雲南已十餘年念老

母乞歸養凡二十餘疏未允而阿克之難起阿克者武定土官鳳朝文之裔隆慶三年武定改土爲流萬曆二十五年鄉官鄭學恨知州黃榜常繩以法遂謀使鳳氏孽孫阿克起兵復土宇知府陳典知其謀攜印避入會城郡遂陷所屬州縣皆被殘破克等率兵長驅至省會索武定印用賓與鎮臣監司咸集於城樓城中士民環跪泣謂郡已破請捐印全數十萬生靈之命時徵兵於祿厚諸司粹難卽至恐城中有變不得已從士民請出印與之賊退兵集乃聲罪致討師分五路戒殺戮明賞罰收復三賊擒其渠魁十二人克計窮遁入東川大兵從後攝之士酋祿壽祿哲等懼代鳳氏受禍遂執克以獻是役也朝廷慮滇南失守起劉綎於家使將兵入滇行至楚而賊已平又發太僕寺銀五萬兩以佐軍興比至已無所用乃留作貢金之費事聞朝議不論勦賊功但糾以棄印之罪三十六年八月逮用賓及總兵官沐叡下獄論死後帝知其冤第以稅使故終贖之既其子疏乞代父繫獄疏下部竟無人敢主其議繼撫雲南者周敬松知滇人甚

德用賓上疏請貸亦不報用賓在獄數年日取參同契諸書玩味紬繹若有所悟一日謂其子曰吾今年必出獄但未知何如出耳亡何疾作許移外治疾遂卒

張會宗字于震晉江人初名九鼎幼有神童稱年十二補郡諸生屢試不遇乃航海入粵寄籍潮州之澄海改今名復補諸生尋舉廣東鄉試隆慶辛未成進士授太常博士萬厯初帝躬親祀典會宗職贊祿容止甚習帝恆曰屬之先是爲博士者多選爲御史會宗性慷慨每論古今人物旁及當世事司銓者心弗善也遂遷兵部武庫主事厯車駕郎中武庫督武學皆貴遊子弟車駕典侍衛馬政貴戚宦近多請屬會宗莅事廩廩諸武弁奉法惟謹干請者相戒斂迹尋出知台州府郡多豪貴能持吏長短會宗繩之不少貸郡有天台赤城爲游士所集上官亦迂途登馬或請飭廚傳以迂會宗曰彼自有雅致奈何以俗吏溷之耶會水災檄下屬邑多濬支河又廣東湖築員明福興塘墾嵩山港水潦始有備治軍簿釐屯田居六

年調岳州岳故衝敵又水旱災相踵至則停漕賦開庾廩勅屬邑賑糜蕪容賓湖春夏泛漲田廬爲墟會宗築隄互百餘里灌莽沮洳皆成沃壤人號爲張公隄荆王構獄屢歲不能決會宗奉檄訊得其情諭以東平河間之雅諸宗始感悔巴陵俗好爭罪其峻訟者屢曲諭之俗以化嘗催科後期停其俸夷然弗爲意屬邑爲民語太守勞民狀民感激爭輸課稱最擢雲南按察副使以忌者修郤遂罷歸初官京師有延平友人寄白金四百兩歸而沒數載不聞問矣比其子來訪台州亦不及寄金事會宗持橐畀之封識宛然孫慶樂字士篤博學工詩明亡削髮卒於天台

楊佩訓字維式晉江人隆慶辛未進士授戶部主事權潞墅關稅酌歲課大率徵商若干定爲額稅半額蠲其五稍及額蠲其八及盈額弛不征鑿橋例可數百金他無名征倍是一切罷之移監徐州稅兼董水部分司如吳關取足額而止官軍給餉例有加耗金卻不受歷遷郎中擢四川參議會採大木巡按郝某劾州縣科派者七人合州知州劉某與焉劉居官廉

佩訓寃之銳身爲白郝恚而合州民詣關號劉寃劉事解而郝疑佩訓主之遂論調廣西猺獞爲亂督府蒼梧兵討之佩訓爲畫策事平論薦擢按察副使備兵桂林尋調四川駐節馬湖故牂牁地也漢夷錯處佩訓飭將吏毋生事戒土酋無侵掠按行屬郡偵其貧廉勤惰以聞人咸畏之所屬敘州馬湖二處久無科第召士人爲文而第其高下由是人文漸盛潘州酋楊應龍始叛有議主撫者佩訓爭之曰爲虺弗摧爲蛇奈何亟上三策請勦之當事屬以西路監軍會北路兵失利佩訓下令堅壁獨與參將曹希彬殿後全師以還久之遷貴州參政巡按論主撫應龍者失策並及佩訓遂左遷罷歸

黃文炳字懋新同安人萬曆丁丑進士知東陽縣擢南京戶部主事權淮揚關關爲陳琛舊所權處文炳署其堂曰仰止其行政皆師之遷平樂知府爲政持大體置驛馬復餘田民甚德之擇猺獞子弟通文字使爲諸生皆瞿然向化擢雲南按察副使署督學事礦使鄭某虐斂殃及諸生欲提

詔治以謝之文炳不可先後列二狀得溫旨且飭礦使無生事時稍忤中使者輒逮繫獲恩宥自文炳始也遷陝西參政卒

弟文炤字麗甫一字季駿專性命之學潛心力行自比於陳真晟嘗游江南訪陳繼儒大相歡契巡按以學行薦朝議欲仿陳獻章胡居仁故事禮之爲忌者所沮崇禎十一年南安才棧之變文炤方與監司曾櫻講學於筍江出片紙諭之立散其德感如此

陳詔字宣卿晉江人隆慶辛未進士授工部虞衡主事領盍甲廠廠中財物故爲中官所乾沒所造盍甲悉薄惡詔至一意精核絕不與中官交權所製特堅好萬厯初遷屯田員外郎會昭陵有譴損詔奉命往修正殿中官議撤而新之詔言於尙書請勿撤三月告成省帑金三十萬進都水郎中奉命視高郵湖隄高郵湖爲漕粟要路平江田陳瑄創築老隄侍郎白昂繼開越河後人狃安越河忘老隄外禦力坐致其壞水人圍田更成一湖淮陽歲患水漕運亦艱詔謂欲安上流宜濬下流於是放儀真通州諸

聞洩湖水注之海濬草灣等口以消黃漲水落見基址乃興工五月而工成延袤四十里又以舊隄尙卑當高之衆不謂然無何水漫隄如詔言增高三丈水不得溢淮陽諸郡遂爲安流摧浙江按察司僉事浙西瀕海爲郡而嘉興之海鹽三面抱海萬曆三年五月颶風大作海潮洶湧石土二塘盡壞詔採衆議條上無按言今石塘之石大小異狀雖錯如犬牙終有縫齟潮水滲漉石不樸屬無以爲完久宜卸之以鐵錠大小之石極使平方騎縫頓疊各極妥貼乃用石灰灌澆調之以膏壇久之灰石加滲水不得入石更以壽撫按是之至則稍基潭派直入地助始下椿樞之心實之以石礫使其上如平地深固可以任仍嚴二塘故式如品字疊砌而地之雖陟不立以順潮勢詔身爲指示避寒暑風露凡築石塘三千五百五十丈土塘二千六百十六丈塘外置蓋浪椿樞二千六百丈椿樞之外鑄鐵牛十二鎮之內開漵浦白羊新河六十餘丈以備異潮漫塘有所蓄洩一以行舟載石用省輦輦一以開河取土築內土塘使異潮蓄洩白羊

河者又得爲障塘河之上酌里數爲木橋五以便往來兩岸植桃李禁樵採令其根護土又用夯築土爲地陂以固之是塘自洪武修築屢興迄無成功正統間費至三十九萬其始役也議者謂當費十九萬期十餘年就自詔爲之費十一萬而已經始萬厯丙子之春明年丁丑九月告竣而杭州海寧塘以乙亥夏月圯二千餘丈撫按復檄詔修築用公帑千九百餘以成於是兩臺及藩臬交薦詔任事忠勤就遷參議巡撫徐斌又奏請開澈浦河道以通蘇松復以屬詔謂大功方畢浙西勞億議先賑貧民徐調夫役復兩月而成遷雲南副使居一年以病歸卒詔起家工部生平所厯皆著治水勞績祀海鹽名宦人猶見詔與故浙江按察使楊瑄並馬下塘上瑄亦治塘有功者也

林一材初名一雉字以成同安人隆慶辛未進士授南京禮部主事厯郎中改戶部裁宗藩額外陳乞又請糧額必準弘治十三年例毋許浮增造功時張居正方行丈量法一材議無浮糧州縣不得概丈以擾民遷浙江

按察副使進雲南參政裁軍伴礦稅以邊才調山西中議左遷副使山西
爲生祠祀之尋遷參政以母憂歸杜門不出 以上道光舊志

唐堯欽字寅可長泰人隆慶辛未進士授中書舍人歷刑科都給事中萬
曆中錦衣鄭承憲爲父鄭福乞葬地福皇貴妃祖也帝給墳價五千兩堯
欽疏言祖宗成憲妃祖無與葬之例祖旣如此父當何如妃祖如此后祖
謂何帝雖不納而貴戚肅然憚之司禮監張鯨怙權躐貨專僉帝罪其黨
附者邢尙智等誅譴有差鯨供事如故堯欽抗言羣奸伏辜而獨庇首惡
法紀安在且中外籍籍不聞公道而聞厚賄陛下以賄罪鯨復以賄用鯨
平與同官李沂同日疏上帝大怒杖沂而堯欽獨得免久之遷太僕少卿
進南京正卿歸卒賜祭葬 閩書

趙範字範之漳浦人隆慶辛未進士知無爲州置學田以贍貧士調磁州
有歧麥芝草之瑞陞戶部郎中督餉雁門有功賜金幣擢浙江按察副使
捐俸興水利值大風雨恐暴漲壞堤自出行水船覆漂流數里許巾挂枯

柳而止一老隸隨拯之得不死以親老告歸遇歲歉多方設賑活鄉里數千人
道光舊志

石應岳字鍾賢連城人隆慶辛未進士改庶吉士授戶科給事中進禮科都給事中疏請祀陳真晟於鄉以崇正學乞經筵命史官入直登記得失萬曆初請節用以裕國儲略言今日上有兩宮聖母陛下之孝養無方內有三宮后妃宮中之經費難已知添進之命誠非陛下之獲已也然陛下之孝不匱而中外稱頌聖母每有節省之諭宮中之費多端而士庶傳聞后妃夙有恭儉之德則歲時進奉百萬兩之金花銀宜足以辦此所患冗食太多糜費不節耳昔唐臣陸贄有言不節雖盈必虛能節雖虛必盈故理財之道不必增其所入而當覈其所出金花銀兩係小民惟正之供我祖宗量入度出定為百萬之制戶部額派各省解進僅有此數原無剩餘今欲添進必借太倉銀兩夫太倉各邊王客之糧饌邊臺城堡之修築與夫召募調遣芻料諸費咸取於斯今雖少有積餘實仰藉威靈震疊敵款

寇急偃甲休兵所致脫或一旦敗盟狂逞則與師十萬日費千金太倉之積貯足以資緩急之需者幾何時哉矧邊今雖寧謐而各處添兵添馬修牆築堡年例撫賞月增歲益加以連年河淮溢流生民魚鼈邇河工甫舉動請百萬何者而非仰給於太倉耶若一季加進五萬兩四季則加進二十萬矣上供歲多二十萬之進則邊儲減少二十萬之積推之十年所少不知其幾往者猶有外省可括今則司府累年之積蓄搜括不遺往者猶有逋負可徵今則閭閻之膏脂徵輸殆盡陛下所知者京庫數百萬之贏餘也而各處之括室鬻子十室九空者陛下必不得而知也夫古之帝王寧藏富於民毋藏富於國寧損上以益下毋損下以益上今四方之財皆輦聚於京庫其富藏於國矣生民之杼軸日空於誅求其損在於下矣臣過計天下財盡民窮且有不測之隱憂竊意陛下他日府庫空虛必將痛恨追悔而深究左右臣工未嘗一言也且使天下後世金花銀多取二十萬自今日始非所以光昭令德而永有聞於天下後世也故能思祖宗成

憲之當遵念國家生民之甚艱凡百費用祇取足於一百萬兩之中而太倉所儲專以備軍國重大之費此經國之遠猷垂裕之至計也誠以萬壽聖節大慶伊邇內庫所貯與秋季所進二十五萬猶不足用再取數萬兩明示此係額外之數不爲定例庶國用可以漸裕民力可以少甦而陛下儉德令名益播聞於廣遠矣時皇嗣生太監劉陽等擬自陞太醫院使錢增爲右通政院判沈禔何雲鵬等爲院使應岳疏言通政係四品堂卿雖虛銜不輕以假人其他醫術精通勤勞久著在內殿供事醫士六年始陞吏目吏目六年始陞御醫御醫陞堂下官者依舊限以九年此萬曆九年明例也此例既定法有畫一之規人無曠等之想所當永爲遵守者今錢增等歷俸少者纔二三年其多者不過四五年律以近例俱未及格乃欲假覃恩之名以爲媒進之階屢畫一之法以開僥倖之門邪聖德格天子孫千億恐後日之援此爲例者踵起紛紛將何以塞其請臣竊以爲寢之便俱報聞復上廣宗藩節資予急修省先後十餘疏皆剴切擢太僕少卿

進正卿再進應天府尹會海瑞爲巡撫民有總憲情如水京兆白於霖之
譴改順天進南京僉都御史提督操江協理院事就擢兵部侍郎召爲戶
部侍郎尋罷應岳奉身儉約歷官中外數十年貧如初 閩書龍巖縣志

田瑄字希玉大田人隆慶辛未進士知吳縣調新昌新昌在浙中號最澆
俗好誣訐人命輒破產瑄痛懲數輩其風始斂又苦盜瑄令每鄉立一人
爲總甲凡盜發令其緝捕盜風亦息歲旱徒跣禱烈日中雨立應歲則大
熟一日行野見田有渠無水問故民曰修渠則屬民而得水則屬勢家瑄
乃舍郊外督民濬築且爲履畝均放之自是豪強不得專據負郭田一萬
三千餘畝悉成膏腴民每候其出爭爲昇輿歡聲溢田野因作分水亭以
憩之瑄慮歲久法湮捐俸置田爲每歲濬渠之費聲望冠浙中時張居正
秉國吏無大小率通聲氣瑄特立若弗知者三司薦七上僅遷南戶部主
事新昌民祀之於邑西瑄入戶部尋權舟淮安時暑正寢疾有詔令百官
走羣望爲禱督漕尙書檄赴齋宮瑄謝不任事竣代還羨金悉以籍之官

初瑄令新昌時與禮部尚書潘晟善時晟以居正薦將入相甫趨裝吏走其門者如屠正瑄不與通久之轉員外郎乞歸再起工部司織造中官每有所冒費輒抑之居二年出知南康府郡當吳楚孔道民以貿易自資商舶避風濤之險不停駐爲築開捍之舟至得泊民生以饒問詣白鹿洞爲諸生剖心性之祕撰辨惑若干卷以聞良知之說諸生雲集因出私橐增市學田七百餘畝爲廩餼資秩滿擢雲南按察副使改廣西參議值粵寇阻籐峽爲亂瑄宣布威德寇卽解散當事者偉之復進雲南副使忌者又撫拾粵西事坐以養寇縱亂詔奪二官遂乞休復爲墨吏所媒孽恚甚疽發三日卒

劉佐字鳳南上杭人隆慶閒恩貢生知霍邱縣土瘠民貧歲旱大別諸山草寇竊發佐撫而戢之境內安謐擢南京御史疏陳時政言天下之治係於用人御史魏允貞以言事謫官佐疏救之謂天下事最懼壅閉不得上聞而天威震赫司言責者每以批鱗爲慮非聖明平日寬其觸冒之罪萬

一臨大利害大事變誰肯爲陛下直言者允貞言雖過當心實無他不過防微杜漸以儆將來所謂杞人憂天之見未可指以爲私也奉敕巡視上江督漕糧運船無後期者

以上道光舊志

張治具字明遇號洞齋晉江人父堯字廷栻少授易於易時中有文譽有族祖爲運判沒於官其孫盜費帑錢數千緡官捕之急爲代償之治具第隆慶辛未進士除永淳知縣甫視事卽除浮賦三百石賈人子賂當道請鑿壙治具力爭之不能得則爲設車稅俾輸郡帑以困之卒報罷移臨海邑多巨室難治治具曰巨室所以導民也不亢不徇其誰撓我邑士大夫竟以此服之邑賦繁重啟奸弊乃分所轄爲四都都聽於接接聽於官以次徵解民無逋賦吏不得侵漁上下便之同知楚人王一麟者陰鷲人也毀其法於巡撫巡撫以語巡按巡按曰此法立爲公乎爲私乎巡撫色沮計乃寢治臨海七年入爲御史巡視京通二倉兼河道已復巡銀庫巡西城兼視十庫事中貴人莫敢干以私者扈蹕謁陵還過老君宮帝意欲留

治具者卒具疏請罷逸游以光盛典帝嘉納之巡按南畿所至懲貪旌廉
不徇毀譽豪家蓄無賴輩以術禁人兒女鬻以爲利名曰國戶民遮道訴
之遣吏窮治其奸所出數百人已按湖廣楚俗賁而自鬻者至奴於其族
更數世猶隸役如舊不得講宗禮治具革之俗稍稍變土司相仇輒指爲
大逆治具曰此細故也比訊報卒無他所轄郡十五州十六縣百餘文移
山積批答無停晷每當訊讞主文吏以故事先具帖說治具悉去之行部
荊州過張居正廬爲存卹其老母時一麟已前死其子聞治具來避旁邑
治具慰藉之士大夫稱爲長者遷江西按察副使備兵贛州地介四省巖
谷深阻猛獍穴以爲梗治具無馭之皆帖服奸人挾養砂術聚衆且爲亂
悉擒治具其黨進參政分守饒州饒故淮王封又尙方陶器所出也治具
核宗祿以時給禁地戶毋得道鬻有以陶器餽者拒弗納提學試饒州饒
諸生與推官爭事擁其署譁甚治具曰此其防不可潰而勢不可激召諸
生至明倫堂論之諸生唯唯謝去已擢四川按察使巡撫爲給事中論劾

命治具勘上狀與劾章相左或言如省臣何治具曰劾者風聞勘者據事
請法以媚人吾不爲也播州民苦楊應龍殘暴避入內地時議驛出之治
具曰播人吾人也方離窀而復納之非情夫馭夷毋太嚴太嚴召蠻毋太
柔太柔啓侮爲設法安戢之卒無事告歸治具大節凜然自勵令以至藩
臬四上計不取公私一錢其按南畿與湖廣事竣日一切往來金幣悉貯
之郡以俟代者永淳臨海皆祠祀之弟治樞

治樞字明勵萬曆庚辰進士授戶部主事尙書欲試其才出各藩糧冊使
磨勘期以三日治樞如期畢尙書疑假手他人摘冊中某郡糧額開之應
對如流尙書奇之舊例覆冊弊隸雲南司乃改屬治樞有旨取濟邊銀十
萬兩入大內治樞言邊儲係國安危詎宜取實內帑設有緩急何以應之
事遂寢時帑金漸不給尙書憂之治樞建議請歲漕東南粟百萬積之大
倉常紅腐不可食南中郡邑距水遠者及以漕米爲苦何不暫行改折以
濟匱乏異日太倉之儲或有不支則成憲具在尙書是其議請行之尋督

備兩浙至則申明舊制正量斛驗燥濕搜剔弊竇民稱便運官豪右無從
侵沒浙水鄉歲稔不樂改折巡撫以問治樞治樞曰擇其便者行之如杭
城之新城於潛昌化山邑也折徵爲便富陽諸鄉東南近山便輸銀西北
近水便輸米推此類行之惟民是計可也竟從其議

著霞草道光舊志

一

明十一

謝杰字漢南長樂人幼警敏博學能古文詞萬曆甲戌進士除行人冊封琉球卻其餽其使入謝仍以餽致杰言於朝返之琉球人爲立卻金亭權光祿寺丞歷兩京太常少卿南京歲祀懿文太子以祠祭官代杰言祝版署御名而使賤者將事於禮爲奏請如哀沖莊敬二太子例遣列侯帝是之乃用南京五府僉書著爲令累遷順天府尹平徭均稅以右副都御史巡撫南贛清四弊陳三策以汰兵之冒者軍民安堵屬吏被薦者以賄謝杰曰賄而後薦干戈之盜薦而後賄衣冠之盜人以爲名言進南京刑部右侍郎二十五年春陳十規疏言前此兩宮色養維一今則定省久曠慶賀亦疏孝安太后發引並不親送前此太廟時享皆躬親今則皆遣代前此經筵臨御聖學日勤今則講官徒設講席久虛前此披星視朝今則高拱深宮累年不出前此歲旱步禱郊壇今則園邱大報久缺齋居宸宮告

災亦忘修省前此四方旱澇多發帑金今則採礦榷稅中使迭出前此用財有節今則歲進月輸而江西之磁江南之紵西蜀之扇關中之絨率取逾額前樂聞讜言今則封事甫陳嚴綸隨降但經廢棄永不賜環前此撫卹宗室恩義有加今則楚藩被訐申璠旋出以市井奸究開膏肉懿親前此官儘任使職無曠錄今則大僚屢虛庶官不補是陛下孝親尊祖好學勤政敬天愛民節用聽言親親賢賢皆不克如初矣不報召爲刑部左侍郎擢戶部尙書督倉場時四方遇災率請改折杰請歲運必二百萬以上方許議折從之三十二年漕運愆期杰憂形於色蚤夜焚香祝天是冬運河冰獨不合漕艘仍如期集朝野異之一年暴卒贈太子少保遣官護喪賜祭葬初杰父教諭廷袤家居老矣族人假其名逋縣賦令劉禹龍言于御史逮之杰代訊幾斃後撫顧禹龍家居未嘗修隙時服其量所著有白雲編子汝烈字其作以貢生授南平訓導擢始興知縣守正不阿權璫欲採礦其邑汝烈杖而遣之旋棄官歸

閩書明史明外史東越文苑

林裕陽字永光長樂人萬厯丙子舉人授蒲州學正遷連山知縣連山窮
壤大璫以礦稅擾諸邑裕陽力爭得減大半擢永寧知州永寧與連州皆
雜處夷獠裕陽每貽故人書但言居職勉自樹立初不知爲蠻烟瘴雨鄉
也進柳州府同知入爲南戶部郎中筦浦口屯田以耗米益正支軍民大
悅出知臨安府土舍盜賊爲梗裕陽以計禽其魁餘皆款服李玉李鳳父
子糾沅州賊入近郊殺營卒裕陽檄土舍沙源追賊於倘佃俱就戮兵備
副使欲盡賊根株裕陽曰某請以撫爲勦卽命騎抵賊巢作簡明歌令耆
老譯諭勞以牛酒令歸耕皆羅拜晚宿賊廬酣寢達旦賊跪進食食已又
之一巢三日而遍皆就撫或問何以知沙源能辨賊賊旣敗方恨我何以
知不害公且就撫曰此易知耳我兵積弱非土舍不能成功沙源往日征
南功格於吏吾能直之故爲我盡力首惡旣戮餘黨喪膽縻之則負固撫
之則方慶得生故來也廣南酋儂紹周新襲位頭目欲立其弟紹陽斯當
道將許之矣裕陽不可竟復紹周四鄰帖然尋乞歸而著崇明安邦彥雜

而廷及傳
作拔用沙源累著戰功人服其鑒

陳瑛字廷玉莆田人萬曆甲戌進士授南京戶部主事推舟淮安多所釐革改工部虞衡司督造清江浦糧艘悉以舊板佐築河又哀新板之羨築高家埕河漕諸大臣才之以塞鄭口功遷員外郎詔以都水郎中董中河事因開梁山新河經羊山至古洪十有二里又開鏡山故河以助梁山流省金錢無算復以寶應越河成擢山東參政督漕儲尋遷廣東按察使河復決雖邳開召還爲徐淮道與總督河道尙書潘季馴築新舊大隄及橫隄月隄十三萬六千餘丈濬故所開鏡山河南北二百二十六丈塞決口三湖淡水瀾四又壩二十有二擢右布政使以父憂歸卒河壩之民祠祀之

宋萬葉字啓紹莆田人父正字韓卿爲諸生精春秋學事父母孝謹治父母冢身自芟草搨土以成正兄宣領正德癸酉鄉薦無子以萬葉後之所親風之曰君雅奇是兒胡不以他兒後兄正曰正謂奇也以後吾兄卒年

八十友人鄭仲卿歿無後屬諸子置田數畝供其祀萬葉事嗣母吳極孝
吳昭於倭將刃之萬葉乞以身代遂得釋萬歷甲戌成進士授黃州推官
本生父卒富事特爲奏請許奔喪歸爲人後者得給假治所生喪自萬葉
始服闋補漢陽府推官遷大理評事出爲南安知府方正詳慎清郡中虛
糧廷民積困民德之立祠以祀遷雲南按察副使值藩臬乏人兼攝數道
夷民安堵尋告歸子光台萬歷壬午舉人

李多見字子行莆田人萬歷甲戌進士由戶部主事進吏部郎中出爲浙
江參政謫太平府通判擢禮部郎中二十五年出知松江府繩右族以法
惠愛窮黎若不及士以文藝謁者接見無早暮甫三月以前任事中考功
法士民鬣石塞諸城門集衆詣闕請留兵備副使江鐸聞之以爲民且有
變率兵至郡罪首事諸生彭汝讓等多見亦遂行賦棠溪吟以見志曰少
小事姑嫜嫻拙強撐持夫子見斥逐大義當乖離奈此乳下兒號泣牽我
衣兒心旣慘切母心亦傷悲母出與廟絕兒行欲告誰阿爺千人傑後母

稱賢慈兒慎加餐飯母子長相依棄置汝中野我行心自知驅車難復顧
惻惻中心使讀者益為悲惋時尚書陸樹聲致仕里居未嘗入公府獨為
多見造門又置酒出餞後起為瓊州知府值黎馬矢作亂多見募義兵親
詣督戰戒衆止擒首惡母妄殺竟擒馬矢凱旋後請於水會所設官兵守
禦尋以母老乞休歸惟圖書數篋渡海檢沈香卽焚之郡人爲建燬香亭
又立祠祀之

蔡國炳字誠中晉江人萬厯甲戌進士知永豐縣

廣信吉安並有永豐縣未詳何隸

邑賦役

重民多流徙國炳陳救荒七議以甦民困流徙復業乃教民以水龍通渠
引澗注始不憂旱寇黃四一等竊發密偵得乳媪王密并藏得盜金人服

其神擢工部主事會通行清丈田畝親詣履勘或謂層岡峻崖中多壑澗可益賦不聽值修陵祀河竭舟楫寡能水者度淺深作木龍築隄瀦水舟行如飛帝廉其能命督清河漕艘每船更造費數千緡國炳度稅入與船費酌爲定式小敝隨修大敝乃造凡可留者因之計三年省費千餘萬永以爲法歷吏部稽勳郎中振孤滯不受私託銓法一清爲同事所忌出爲廣東參政時申嚴闕船下廣之禁陳子實當辟議生之不得乃分首從以狹死者抵罪餘皆論配所全甚衆遷四川按察副使駐珂州有江行四十里至秦梁二灣地益陡急遇漲輒決田而地多魚梁國炳歎曰陡絕如此尙梁而障之乎乃措金伐竹令營卒磊石爲坎疊土爲埽旣成地爲沃野土官馬應麟死無嗣其弟應龍當襲職應麟妻翟氏據印收稅糾部落與應龍爲難國炳遣諭利害翟懼歸印國炳上言應龍桀驁宜令其子代襲翟氏旣納印當多給銀穀以贍餘生詔從之丁父憂服闋以母年九十遂

不出

郭惟賢字哲卿晉江人萬曆甲戌進士授清江知縣拜南京御史屬有掣鹽之役故事商船多者坐以夾帶少卽坐以盜賣而御史所取贖鍰以十一濟邊餘入私橐也惟賢疏言御史職糾察奈何親鍰金今工部龍江廠竹木主事一人掌之而以御史監督臣謂戶部職錢穀御史職糾察各有司存請亦令主事掣鹽而御史按督如龍江竹木例於是惟賢清節大著張居正柄國言事諸臣俱得罪會皇長子生詔赦天下惟賢言建言諸臣如吳中行趙用賢艾穆沈思考鄒元標傅應楨朱鴻謨余懋學諸臣多在戍籍乞行赦宥是時居正已死馮保猶居中握權責惟賢黨護謫江山丞三月保敗還故官按蘇松以水患疏蠲其租劾左都御史陳爝希相臣指論御史趙耀趙應元不可總憲紀皆罷去又薦王錫爵賈三近孫鐘何源孫丕揚耿定向曾同亨詹仰庇等俱獲召一時名動天下故事戶部錢穀出入悉送閣覈驗惟賢謂漢相不問錢穀奈何祝而代庖疏止之王事董璫諫內操被謫疏救之又請復午朝召對諸大臣商時政忤旨調南京大

理評事尋遷戶部主事司倉糧軍人受粟無稅者咸歡呼郭公飽我餽
南京吏部郎中值丁亥計事尙書李世達都御史海瑞咸重之遂委政焉
汰黜精嚴貴勢無所撓人服其公厯順天府丞時亢旱帝屢遣中官偵府
尹所爲惟賢方齋沐步禱帝聞大悅二十年以右僉都御史巡撫湖廣楚
米輸二京賦一輸二惟賢定三楚賦役全書省加徵私派之弊景王封德
安國絕及帝弟潞王之國衛輝悉以景賦予王王奏賦不及額帝爲奪監
司以下俸惟賢言景府賦額皆奸民投獻妄張其數臣履畝計賦亦得二
萬五千皆實數何言不足且潞去楚遠莫若徵之有司轉輸潞府會典皇
莊及勳戚官莊遇災蠲減視民田今襄漢水溢王佃民流亡過半請蠲如
例荆府奏補漣祿幾二萬惟賢請以太和山香稅給之其餘以佐軍興民
得免派復言長沙寶慶衡州三衛軍士率移戍武岡而寶慶永州寧遠諸
衛復遠戍廣西柳州皆正統弘治開一時權宜後沿爲例貧軍窮伍終歲
不得休息寶慶去廣西千餘里而遙瘴癘交侵生還無幾是以邵陵軍士

目爲死戍臣請分三衛之戍武岡者爲上下二班更迭輪戍而罷其戍廣西者帝悉報許黃梅故無城括所節餉金及公羨得二萬餘請於朝建石城又言治楚四事一重辰沅兵備之官二專土司東西之職三禁官兵之私贖四議給餉之次第楚西南地臨苗五溪五寨間出掠民索贖官兵幸無他亂匿不以聞有貧不能贖者爲歛餉以佐故惟賢疏言獨切承天守備中官以徵興邸舊賦請罪潛江知縣及諸佃民旨下撫按勾捕惟賢言中官充問事撫臣爲勾捕二百年來所未有臣知守法而已帝直其言而止楚庶宗出城淫博江夏令不知爲宗人也答之楚宗人大鬩窘辱令惟賢言禮部見行宗藩事條有無名宗人一禮究治之文又律嚴故勘故入不知不坐令答庶宗坐不知耳因請給東宗人毋犯有司法專乃解鎮守承天大璫劾鐘祥令奪職惟賢復由救之裏世子幼叔某部王請攝先以重幣惟賢卻之入爲左僉都御史協理院事言行取不宜久停言官不宜久繫臺員不宜久缺復言天下多故乃自大儉至監司率有缺不補政日

廢弛且建言獲譴者不下百餘人效忠者皆永棄帝不納六年秩滿遷左
聖部御史協理如故請建皇儲簡輔臣亟考選下推舉停礦稅諸疏皆不
報久之以憂歸服除築室課耕與里人林雲程何喬遠結吟社起戶部左
侍郎未上卒贈右都御史賜祭葬天啓初謚恭定子夢詹光詹
夢詹字駟雨以蔭補太常典簿遼東失事文武吏但議增餉夢詹請以兵
三萬出關奏不行時論壯之光宗卽位孝靖太后尙仍妃號亟言於太常
卿疏請退崇進太僕丞擢戶部郎中督餉天津佐尙書畢自嚴覈本折徵
貴賤所省不貲

光詹字廷璜以歲貢生知於潛縣歲編丁田皆自衡定一介不苟取嘗贖
家田以自給其清介如此遷黃州府通判

黃道瞻字臨汝晉江人萬曆甲戌進士知遂昌縣先是遂昌大饑民流離
東西求食乘間爲盜長吏捕殺莫能禁道瞻歎曰民視死盜與死饑等故
多盜力請賑饑盜遂衰息其秋大稔民擔負實所賑倉道瞻時策一羸馬

行阡陌開閭疾苦勸課勞來之改宜與邑多大猾招亡命爲奸宄吏捕急則入太湖爲盜道瞻計擒其渠誅之其黨立散召入爲兵科給事中疏薦孫丕拱曾同享李世達部光先耿定向屠義英何源膺仰庇等可大用論糾南北兵部尚書及大帥不法事又言戚繼光宜用之北邊不宜處粵東散地忤旨謫永豐縣丞歲餘遷河間推官尋擢刑部主事復忤旨謫兩淮鹽運判官父病棄官歸起兵部主事調吏部之官兩月卒

楊廷相字君贊晉江人萬曆甲戌進士知丹徒縣以清勤得譽歷兵科吏科給事中進都給事中嘗偕刑部錦衣衛籍張居正家尋常刺牘悉火之在吏垣先後九年建白多持大體不手舉谿刻求名同官姜應麟以請建儲降極邊雜職戶部員外郎沈璟亦以乙定大本降三官廷相疏言二臣以抗直觸天威宜曲賜寬宥庶言路不塞累遷南京通政使乞歸卒之日敝廬一區薄田數十畝而已孫元錫

元錫字康侯崇禎甲戌進士時年十四授中書舍人遷吏部文選主事歷

郎中流寇陷京師南歸途被賊刃投諸江蒼頭沿江尋數里得之撫之微
溫泣負以逃道旁有僧舍款扉投宿僧出匕劑扶其齒灌之夜半漸甦居
數旬扶病歸 以上道光舊志

蔡時鼎字台南漳浦人萬厯甲戌進士知桐鄉縣吏數欺其年少時鼎廉
知之一一發摘邑人大驚丁父憂起補元城勤慎廉約民說而安之十一
年徵授御史太和山提督中官田玉兼分守湖廣行都司時鼎言太和山
提督內臣始宣德閒未有兼分守者兼分守自成化末始隆慶初太監呂
祥倚勢虐民爲巡按御史所奏下兵部議革久矣且刑餘之人假之以權
何可復制今事干外廷者隨奏隨行事干內臣者輒言輒寢臣恐內外異
趣言路靡通所關匪細也因及玉不法狀疏入不省然中官畏憚之御史
丁此呂以劾侍郎高啓愚被謫時鼎疏言此呂參論科場楊巍詆其誣賢
亂政方啓愚以舜禹命題禪受之言盛傳衆口卽張居正未敢萌是心啓
愚未敢以是勸然采羣言告君父正所以禱奸人魄也巍生平端謹乃入

吏部輒阿比政府而驅直若此呂反以妄言亂政詆之何以定國論哉報
聞尋巡鹽兩淮咨訪宿弊悉捐其羨開築湖堤三十五里間舟行無恐又
置屬邑學田越二年還朝會戚畹子弟有求舉不獲者誣順天考官張一
桂私其客馮詩章維寧及編修史鈎子記純帝怒柳詩維寧一月而調一
桂南京時鼎極言宵人蜚語直達御前縱其事盡公其言盡實猶恐開議
間之門廣告訐之路矧又假實濟誣因公行私哉臣願陛下自今凡百幾
務仍普示外廷明辯是非毋以舊臣之言爲皆不足信毋以新暱之言爲
槩不足疑疏上帝不從責時鼎疑君訕上謫馬邑典史卽日就道旋告歸
居二年吏部擬序遷不許御史王世揚請如石星海瑞鄒元標例起之廢
籍不報已起太平推官署府事值歲禮請於撫按築堤開糴進南京刑部
主事就改吏部十八年冬復疏劾申時行言比年天災民困紀綱紊敎吏
治混淆輔臣時行樹黨自堅忌言益甚致天下佞諛成風正氣消阻方且
內託之雅量外託之清明此聖賢所以重似是之防嚴亂德之戒也夫張

居正之禍在徇私滅公然其持法任事猶足有補於國今也改革其美而
紹述其私盡去其維天下之心而益巧其欺天下之術徒思徼福一身不
顧國禍若而人者尚可俾相天下哉疏留中尋進南京禮部郎中吏部推
孟一脈爲應天府丞時鼎爲江西提學副以呂興周馬猶龍帝怒一脈及
時鼎皆用副者給事中章羽正率同列上言陛下不用一脈時鼎中外謂
建白之臣不惟一時見斥而且復進無階銷忠直之氣結諫諍之舌非國
家福疏入忤旨奪俸有差復擬尙寶寺丞亦不用時鼎居南京益肆力經
史百家尤嗜周易窮極同異注疏解釋未及成書而卒年僅四十三貧不
具舍斂士大夫合購始得舉喪

闕書明外史明史

林纘振字公悅漳浦人萬厯甲戌進士授工部主事司後庫

名節鎮庫嘉靖八年設

視事數日有中貴人僞言大內欲造象牀者索庫金且萬計纘振抗聲曰
取庫金不下大司農而以一中貴傳旨平移內監誅之則詐也歲終庫掾
進羨金數百卻之巡庫給事中貴倨語稍侵纘振曰當職不法公卽

上聞工部承命守藏不承命媚公也給事中面發赤去未幾續振卒橐餘俸金一餅耳年僅二十七道光舊志

蔡夢說字君弼龍巖人父謨字宜中嘉靖間歲貢生授處州訓導知德安縣當衝達又苦旱潦謨覈徭賦畫爲令甲俾諸役得與民持符給精吏無所染又覈郵傳除諸駟僧窟穴有豪家發冢誣良民坐重辟護躬詣墓所具得豪家奸罔狀平反之時稱神公夢說萬曆甲戌進士授中書舍人擢御史巡撫南畿築堤銅陵人稱蔡公堤再按廣東時張居正卒事敗諸顯人俱蹈藉快意夢說按雷州見其子在戍所備困苦爲疏請寬卹士大夫以是美之自居正後申時行王錫爵兩國夢說絕無所依倚常言士君子不欺其心則忘其怨於人按廣東三年戢撫瓊饒諸寇又造湖城梁以禦水患尋羅廣東副使進參政二十六年交趾賊翁富再犯欽州總督戴耀命夢說隨軍紀功夢說嚴止妄殺尋告歸粵人夢說遮留舟不得發續漳集連繼芳字以善龍巖人父一實邑諸生嘗分田六百畝以贍族人當事爲

建尙義坊旌之繼芳萬厯壬辰進士授德清知縣不爲操切之行以不善事上官改州同遷廣西按察僉事分巡右江道時交阯及烏蠻侵擾奉敕征討屢戰克捷積寇以平南寧潯州諸郡咸勒碑紀德乞終養歸年七十卒初繼芳遷謫後浮沈且三十年夷然安之早夜殫精任事無挫顧憲成贈以文曰人往往以境轉我弛然自廢公能以我轉境抑而愈振不爲憂患摧志必不爲安樂肆志也

沈孟化字觀瀛永定人萬厯甲戌進士縣邑無城孟化節縮千餘金督民築之擢刑部主事遷郎中出知湖州府值大旱發賑平糶活數萬人通判龔先進推官李周著爲當事所齟坐落職孟化毅然曰良吏黜何用守爲抗言力爭卒直之厯遷湖廣參政稅監橫恣禁戢之稅監怒以抗旨庇屬聞或諷之求援恬然曰今之求援何如始之不抗坐奪一官左遷廣西按察司副使章酋煽亂劫掠思陵州奉詔勦捕乃調集士兵數軍餉遺裨校捧檄入穴論以禍福責以大義賊大感悟解散而黨陸佑黃尙負固督重

兵蹙之擒佑黃於風門嶺復爲參政分守右江瘴徭時相仇殺出掠擄督
指揮朱堯武等往勦斬其渠百餘諸峒皆就撫降者數萬悉入堡伍尋以
入賀卒於泰和舟中

游朴字太初福寧人父德字廷光將赴試母泣送之遂築室南陽不復進
取與弟廷奎友愛鄉里化之凡兄弟有爭者輒相譬曰不見游德兄弟耶
朴萬曆甲戌進士除成都推官人爲大理評事歷遷刑部郎中三主法司
無一冤獄任刑部者多師之擢湖廣參政分守承天發大豪李天榮不法
事論死竟以是投劾歸性孝友與弟韶白首同居老而彌篤人謂能世其
家焉

陳勛字世勉寧德人萬曆甲戌進士知餘姚縣餘姚簿書山積勛頃刻立
剖諸當道有曲法相屬者不少徇遷南京刑部主事擢四川副使有鄉貴
橫施於民捕其家人懲以法進廣東參政將吏獲海上民誣以大盜株連
常數百人勛面鞠其僞盡釋之尋爲權貴所擠謫官起廣西副使備兵左

江是時川貴會征播州酋楊應龍勛簡土司兵數千往援大破之川貴總督上其事會皮林蠻反遂晉參政領監軍道協勦勦率二萬人生擒苗首其餘撫解萬計以冒暑深入致疾卒論功贈太僕卿賜祭葬勦服官清節居鄉懿行皆人所難及子得姚字仲虞博通經史文名噪一時天啓中選貢授和州州同崇禎八年上官檄令防江得姚挾一僕往適賊寇和州圍城七晝夜一夕風雪大作守者皆僵城破知州黎宏業被害得姚妻尤氏罵賊不屈死得姚在鎮江聞難募勇士禦退之遂署州事州經亂後加意撫循民賴以蘇去之日多攀轅號哭者家居甘澹泊絕干謁鄉望如其父諸葛應科字弼父晉江人父希孟字毅之家貧力行善應科舉萬曆丙子鄉試授趙州學正遷湖口知縣歲饑賑救不遺餘力每退則告其妻子曰吾今日所行政如是如是以不善事上官改益府審理王重之請於朝以爲長史子昂

昂字公韜七歲能文九歲時父同年生何喬遠過欽出手中筆曰兒能賦

此耶曷云巧匠經營仰蒲葵於徂暑旬麗雅製約筠蘭以先秋出入懷袖之閒解炎蒸於俄頃周旋琴書之閒借涼燠以去留執笑丹翎規承古帝葛巾白羽自我家侯喬遠撫其背曰可見可見鄭維嶽李光緒每過輒出所作屬校讐之應科磊落落酒客至必命酒賦詩曷竭力承奉以適其意時謂父有曾點之狂子有曾參之養云以上道光舊志

劉庭蘭字國徵漳浦人少至貧兄庭芥攜之讀書山中餽粥鹽醯僅具敝衣不掩肘提學試元符得一角獸論大奇之萬曆丙子與兄庭芥及從兄庭蕙同舉於鄉是年北畿魏允中南畿顧憲成與庭蘭並爲舉首皆負雋才時人稱三解元尋與庭蕙及允中憲成同第庚辰進士張居正專政災異迭見中外方競頌功德庭蘭與允中各上書座主申時行動之補救時行不能用值允中兄允禎上疏忤旨謫判陳州庭蘭上書許國請申救語極懇切都人壯之以父喪歸卒不及官所友自允貞兄弟及憲成外有鄉元標郭子章蘇濟與同邑林纘振諸人庭芥官至紹興知府庭蕙字雲嵩

生五月而孤母陳撫長之初知新樂縣有虎患爲文祭之虎徙去歲旱開渠灌田民賴以濟累遷廣西參議值沙耶叛庭蕙偕數十騎入其地諭以大義皆就撫改提學雲南深得士心後以册封事與僚佐不合解組歸庭蘭兄弟與允貞允中及其弟允孚皆有名世所稱南樂三魏漳浦三劉者也

閩書明文

陳璧字道良福清人萬厯丁丑進士授歸德府推官以風裁著入爲禮刑二科給事中劾都御史李材爲執政所忌出知南直太平府時水旱疾疫交作璧捐俸賑錢米給醫藥活民數十萬死者予之棺民穿土得黃白二金以獻璧悉以修城垣新學宮璧性嚴正精核吏胥不敢平視獨加意諸生每月再課士捐金購書籍治禮器百度俱修擢廣東按察司副使領提學道遷湖廣參政山東按察使所至風紀凜然在湖廣值奸人王首仁誣親藩在山東值惡璫陳增誣益都知縣衆皆觀望璧獨奮然持議不可奪等以右布政銜備兵淮揚又與璫忤乞終養未幾卒

閩書福州府志

林休徵莆田人萬曆丁丑進士官御史吳兌拜兵部尚書御史魏允徵劾兌歷附高拱張居正且饋馮保金給事中王繼光亦言兌受將吏饋遺兌上疏自理言臣咎積一身未嘗償疆場之事休徵論兌歲以金贈媚北部將佐皆以萌多寡爲遷調尙得謂不僕事乎帝乃令兌去

蘇濬字君禹晉江人父玉字子琢性慷慨好義有里正赴公旬不能上計簿吏持之急適玉爲女泊裝撤墜資以濟之鄉有六里陂縮九十九溪之水入海所溉田居邑什三掌陂者弗習水以玉代之中有白鷺埕延袤十餘里某甲利之欲築爲畛玉力格乃已濬萬曆丁丑成進士授南京刑部主事改工部董慈寧宮事先簿正各材中官不得爲奸利張居正有疾九卿爲祝尙書以青詞命濬濬辭十一年分校會試取李廷機爲第一濬與廷機同邑又幼同筆硯廷機舉解首久在公車名噪海內濬取之不以爲嫌天下亦無議濬之私者尋改禮部出爲浙江提學僉事校士率單車入館中不倩幕客恆開門試士士卷未竟濬閱已徧鑑賞收拔多破常調每

卷閱竟或重閱然後定甲乙所得皆簡材鄉試榜發凡七十餘人皆其前茅士也遷陝西參議捐俸葺屬邑學官與士談經講藝時屏騎從單騎行村落閒下馬入民舍問疾苦父老長跪持斗酒具園蔬進酒享之若父兄然秦中苦役白撫按用條鞭法礦盜趙天知等聚家數千列柵拒官兵潛挾二僕抵巢親執渠魁置之法遷廣西按察副使轉參政岑溪獨變起廢將陳遵以吳廣爲先鋒清身督戰討平之擢貴州按察使以病歸未幾卒潛不標道學名而能深造居家以孝弟爲宗當官以義利爲防廉不買聲介不絕俗在廣東時廷機當國潛移書第曰某賢未遷某賢未起語不及私泉州蔡清陳琛皆有特祠至潛而三潛進退與二人相類其講解足相發明而文采過之學者稱紫溪先生從弟舜臣

舜臣字哲甫萬曆丙戌進士授刑部主事主獄者誤入三人大辟舜臣爲剖析得末減王錫爵當國欲改爲吏部以疾歸起太常寺典簿擢六安知州六安故膏腴地舜臣至汰歲例千餘金故事民間市田非納券金於官

不得鬻舜臣第取券印給之悉免其稅知府墨舜臣屢失其歡嶷御史論之罷歸

劉霖字潤蒼漳浦人萬曆丁丑進士授行人擢御史外戚李氏乞賜莊田霖三疏力爭奉敕勘京畿河南山東屯田力陳貧戶苦弊狀得免馬價三十餘萬反申藩府橫奪民田歸其田於民巡按江西風裁甚著出爲河南副使遷廣東參政未上卒從子正中萬曆癸丑進士爲刑部主事嘗置大瑞馬欽於法

董廷欽字仲恭閩縣人萬曆己卯舉人授金谿教諭署金谿樂安東鄉諸縣事並著賢聲東鄉爲鄉六分隸東西東田腴而賦輕西田不勝賦民不堪命搢紳請於當道議平之令初下東田人大譟而西人持之愈急遂操刃相攻里門晝閉巡撫欲兵之廷欽力請得止兩鄉民卒如令樂安多盜竊喜屠牛俗重壽辰每設譙以靡侈相尙廷欽爲條教禁之風遂變擢南京國子博士太學生姜某者鎮江巨室也勲臣某屢睨其所有而不得乃

誣以殺人廷欽爲白於巡按御史得釋而姜殊不知也然竟以此爲勲臣所中出爲欽州知州州民多遷徙廷欽建平南浮橋以通商賈招集流亡使耕廢坂民始安業州庠久爲他郡占籍州子弟不知書廷欽使里立社學擇師教之朔望令一至學宮習禮自是向學之士稍稍出焉州與交趾接壤海有龍門港陸有黃十營皆要害廷欽請復瀾洲戰艦召募壯丁成之厲兵增壘以備要衝交人不敢犯珠池寇林茂餘黨肆掠海上參將陳震討之敗績寇益熾進薄欽州廷欽召村民簡壯丁雜卒伍嚴守禦賊知有備乃退漸凜羅浮河洲思勒四峒皆州舊隸而漸凜土官趙良臣少年有才略麾下精卒六百餘人守土者以細故禡其父職遂各叛去廷欽推誠招撫請復良臣官署爲四峒長良臣大悅盡獻交南圖徑會莫氏爲下所逐擁兵奄至城下廷欽召良臣兵協所部兵驅之旣而莫氏勢窮載孥來歸欲借居境內當事者將許之廷欽力持不可遣兵護之歸國論功遷韶州同知欽州民爲立祠於分茅嶺韶州多盜廷欽令里立一堡堡設兵

一隊周微守望如盜發弗捕罪連兩堡盜遂解散權治洗厰居二日有巨
商投牒正稅十而餘百之詰其故答曰正以還朝廷餘則厰官費也廷欽
愕然曰嘻厰官乃勝朝廷耶請黜所餘以佐軍需尋署肇慶府事有巨盜
駕艤觸海上掠富人墳墓掘其棺或掠其子弟勒贖受害訟無虛日督府
遣官軍捕之不得廷欽募善泅者伏水中持巨鑿鑿沈其舟禽其魁戮之
俘二百餘人境內肅然督府大奇之議擢知府以察典調去行李蕭然督
府歎曰董君故自冰葉然何至此厚贖而歸之久之再補思明同知中貴
遣使入郡索寶且督其土稅冊知府患之廷欽令軍民白衣露刃列道左
右使者懼生亂遂寢尋知潯州府復坐累左遷岳州通判再遷靖江王長
史遂告歸未幾卒廷欽行誼敦至嘗次徐州有同郡舉人林偕春病且革
偕春族多賈京師附鑑至數千金從者謀分其金散去廷欽聞之爲請於
官封識其物並經紀其喪而歸在廣西時巡按御史嘗有意督過新寧養
利二知州廷欽力陳其冤巡按領之至課日乃語之曰微董思明君輩幾

不白矣出所條示二人二人皆得出請廷欽正色勸以後劾巡按益重廷
欽子養河 以上道光通志

黃克纘字紹夫晉江人萬曆庚辰進士知壽州愛民禮士不避權要申請
編派等則民賴之入爲刑部員外郎出知贛州府歲稔發倉以賑全活甚
衆累官山東布政就遷右副都御史巡撫其地日本陷朝鮮山東守臣議
增兵令六郡民輸餉至四十五萬有奇及兵罷餉減猶歲徵二十六萬民
不能堪克纘大爲裁汰濟寧金鄉十五州縣災克纘請折漕粟石銀五錢
民大稱便河決蘇家莊全河北徙濟寧及魚臺單二縣沒民田無算歲賦
十萬無所出克纘曲爲計畫以他財賦補之公私並濟時比歲不登稅使
又所在脩削克纘力爲調劑與民裁闕狹蠲煩苛惠政甚著屢以平盜功
加至兵部尙書四十年詔以故官參贊南京機務爲御史李若星劾雲中
所劾還家候命居三年詔履任四十四年冬隆慶殿災是時礦稅病民已
詔停復中寢克纘抗疏極諫言自乾清宮災而宸居非舊皇極殿災而視

朝無所陛下宜深加省咎痛自刻責乃稅使四出盡括天下金錢歸內帑
百姓賣妻鬻子以償者幾二十年採木運木計一木費二三千金一入京
師任其朽腐或致竊用天下庫藏民閒膏血豈能供此關陝吳越津滌
皆有織造使斂絲民間此物積之深宮猶塵土取之小民如血肉曷若減
免之以蘇民力哉至九邊士卒枵腹乘陣月糴通負動至數百萬邊臣告
急疏十餘至始出聖母所積二十萬金其餘仍責之戶部不知戶部之匱
也自金花銀增至二十萬而太倉之積罄矣今獨不可以取之戶部者還
爲戶部用耶親王婚禮珍寶數十萬金強半爲製造者乾沒以國家至親
資中涓以牟利何計之不審也委任輔臣實實用其言毋務以虛詞縻之
優禮大臣宜深加體恤何苦以兼官受之逐臣去國不聞賜環之期循吏
入都杳無拜官之日忠於社稷者辱之以繫獄勞於封疆者罪之以快讐
章疏不省臺省幾空天意安得不震怒災變安得不頻仍哉三輔近地至
父食其子妻食其夫此足以示警矣而其殘物害民之狀陛下未及觀也

惟宮殿肘腋之近夜半火光燭天使陛下見之心驚膽悸顧旬日以來未見發號行事有以大慰人心者祖宗二百餘年鞏固之家室而輕視之曾不如數百萬金錢之可愛亦失所輕重矣願陛下大悔前愆一更舊轍收羅人材以濟時艱罷稅停織與民休息換居積以安邊疆修儲教以燕翼子下章疏聽人言以宣暢羣情庶幾人心悅天意格而災變可弭也不報召理京營戎政改刑部尙書受兩朝顧命有安邦固本之褒李選侍將移宮其內侍王永福姚進忠等八人坐盜乾清宮珠寶下吏克纘擬二人辟餘俱未減熹宗命辟六人餘遣成克纘言姜昇鄭穩山劉尙理不持一物悉逐拾地上珠還之選侍而與永福進忠同戮輕重失倫況選侍篋中物安知非先朝所賜是時諸璫罪重謀脫無自惟請帝厚待選侍則獄情自緩於是流言四布謂帝薄待先朝妃嬪而克纘首入其言帝不悅責克纘偏聽命如前旨已楊漣陳移宮始末帝卽宣諭廷臣備述選侍凌虐聖母狀且曰大小臣工惟私李黨責備朕躬克纘皇恐上言禮父母並尊事有

出於念母之誠跡或涉於彰父之過必委曲周旋渾然無跡斯爲大孝若
謂黨庇李氏責備聖躬臣萬死不敢出此御史焦源溥力駁其持論之謬
克纘奏辨因乞罷略言源溥謂在神宗時爲元子者爲忠爲福藩者非忠
臣敢廣之曰神宗既保護先帝授以大位則爲神宗而全其貴妃富貴其
愛子者尤忠之大也又謂在先帝時爲二后者爲忠爲選侍者非忠臣亦
廣之曰聖母旣正名定位則光昭刑于之令德勿遽傳宮幃之忿爭尤忠
之大也給事中董承業孫杰毛士龍御史潘雲翼楊新时期南京御史王允
成等並劾克纘是非舛謬克纘不服言曩不舉李三才故爲諸人所惡源
溥復劾克纘借三才以傾言官克纘奏辨再乞休帝不問天啓元年冬加
太子太保尋復以兵部尙書協理戎政廷臣議紅丸克纘述進藥始末力
爲方從哲辨給事中薛文周詆其滅倫常昵私交昧大義克纘憤援春秋
不書隱公閔公之弑力詆文周且白選侍無殿聖母事得旨選侍向有觸
忤朕一時傳諭不無過激迨念皇考其能怒然且羣小排東林創要典亦

推克纘爲首功矣時東林方盛克纘移疾詔加太子太博乘傳歸四年十
二月召爲工部尙書視事數月裁忠賢紫陌石費三十萬其黨又欲取南
畿舊殿廢銅克纘不應忠賢怒復移疾歸三殿成加太子太師崇禎元年
起南京吏部尙書有劾之者不就五年給事中吳執御薦克纘及劉宗周
等帝惡其朋黨下執御於獄克纘尋卒於家克纘官中外清強有執獨議
三案爲小人所借然侍講倪元璐於崇禎元年上疏言克纘處君子而不
求同遇小人而自爲異本末炳然惜管華之席未割韓老之傳同編不免
有攻擊耳數語爲得其實子道敬以父廕歷官戶部員外郎嘗蠲地一百
六十餘丈築岸以蓄洩海潮道爵以父廕積官刑部郎中終楚雄知府明
史明外史

洪有復字懋純南安人萬厯庚辰進士知武陵縣時張居正富國楚人席
氣燄麾斥縣官暴橫邑里有復裁抑之不少貸居正啣之及居正敗始擢
工科給事中前後數十疏請裁傾謀減織造又請視京營以酌兌馬糈精

練歸占役簡材官卹士任皆裨時政中貴殺人有復疏論之中貴走匿其
黨泣帝前有自屬刑部有復再疏竟抵罪歷禮科左給事中進士薛敷教
疏論巡撫不法詞連吏部尙書部院授有復意使彈敷教有復曰吾有去
耳因自求外轉補廣東按察副使就遷參政駐羅定時州邑初建所撫獠
獠與諸民分籍而處恃衆喜亂有復布盛德久之皆請隸民籍廣西岑溪
獠叛攻城屠士卒有復從總督陳璘部署三道入山進勦大破之上功賜
白金遷浙江按察使稅使不戢民罷市亟會諸撫按議稅悉罷歸有司民
遂定進湖廣右布政使轉左適礦稅肆虐湖海開有復力爲民請命帝撤
中使以礦稅屬郡邑如浙江而更置巡撫皆有復力也卒於官祀名宦弟
有臨從弟有聲有助有聲子啓初

有臨字懋貞九歲喪母哀毀如成人奉兄愛敬備至兄疾爲摩搔視藥惟
謹兄寢乃退爲諸生有文名從弟有聲字懋文萬曆甲戌進士知信陽州
地瘠又當孔道有聲銳意撫綏有許吏目者藉富道戚屬虐而貪以法繩

之爲所中譎大同與史民數千伏闕訟寃不可得久之稍移懷仁知縣經理互市有方邊人畏之歷遷南京工部郎中以母老乞歸有助字懋遜萬曆壬辰進士授南安府推官高潔明敏郡郡之訟皆來質焉嘗辨南康縣事清沈宿弊立徵收串票之法無重追虛納增減諸病入爲工部主事遷廣州知府移徽州大猾周道明募無名內關沈繼先假勅煽威有助察其僞置之法終廣東按察副使有助當官守法持節而篤於倫理遇故人有恩意物論歸然有聲子啓初字爾遠萬曆癸丑進士授戶部主事權濬墅關故有北關凡兩稅商因莫支疏請罷之諸商懼躍舟蔽江下羨金至萬餘籍上之尋典試雲南適貢金騷擾啓初疏陳其害遂得免著爲令官終兵部侍郎

徐民式字用敬浦城人萬曆庚辰進士除松江府推官入爲戶部主事歷安慶知府安慶瀕江劇郡墾稅歲千金帑額倍之民式盡汰去積月俸置郡縣學田又建預備倉積米穀百萬石以備旱潦二十二年陳于陛當國

請舉天下循良二千石處以京卿民式獨應其選尙書孫丕揚亦疏薦擢
光祿少卿歷遷副都御史巡撫應天吳中田土十九入縉紳家其貧者復
投託寄戶不供徭役平民不堪其累民式深知其弊遂決意奏請均賦士
大夫當役者以官高下爲差踰額者皆供役於是縉紳羣起而譁訴於葉
向高向高謂有田逃役而無田當徭實不平事撫臣爲地方計不可深非
署戶部尙書孫璋亦力贊民式議得旨允行且著爲令民累一甦民式嘗
言吾聞人寡援仕宦當甘人後方不失爲海濱鄒魯其恬於仕進如此弟
民俊字用章萬曆乙酉舉人授沔陽州學正擢瀘溪知縣縣爲滇黔咽喉
驛路往來民疲於奔命民俊令民輸直聽官雇募一時稱便苗民負稅曉
諭之輸如額調澄邁其地黎蜚雜處示以恩信咸帖服尋告疾歸以上道
光舊志
李懋檜字克著安溪人萬曆庚辰進士知六安州州賦役淆亂舊分上中
下三等有家已落而仍納上戶者懋檜手爲程量均其額定爲一則州人
便之又設社倉義田積歲入以贍貧民升刑部員外郎言於尙書陳謙獄

不允者三事一謂中官與兵馬司詔獄失出一謂臨江知府錢若廣罪違
父老詣闕訟寃並謫塞外可閔一謂侍郎洪朝選以勘遼藩忤張居正指
闕撫勞堪希意窘朝選死獄中坐假旨擅殺大臣法不蔽罪尚書斂容謝
之十四年三月帝方憂旱命所司條上便宜懋諭言皇貴妃及恭妃册封
事謂元子國之本恭妃異日爲國母夫使國母位次皇貴妃下臣有以知
皇貴妃之必不安也不惟皇貴妃卽皇上亦必不安也自今以往恭妃見
皇貴妃禮能如前日乎能不跼蹐自疑乎夫使儲君國母兩懷自疑恐非
皇貴妃之福臣以爲宜益封恭妃位在皇貴妃上卽不然亦當與貴妃同
恭妃安則國本安矣帝怒欲加重譴居數日帝亦霽威而懋檜疏又有保
聖躬節內供御近習開言路議蠲賑慎刑罰重舉刺限田制七事亦寢不
行明年給事中邵庶因論誠意伯劉世延妄言刺及建言諸臣懋檜上言
我國家之制凡諸司百執事皆許直言無隱慮至深遠庶因世延之條陳
而波及於言者欲使堂上官禁止司屬毋得出位妄言夫防人之口甚於

防川庶豈不聞斯語哉今天下民窮財殫所在饑饉山陝河南婦子仳離
僵朴滿道疾苦危急之狀蓋有鄭俠所不能圖者陛下不得聞且見也邇
者雷擊日壇星墜如斗天變示敵於上畿輦之閉子弑父僕殺主人情乖
離於下庶以爲海內盡無可言羣臣盡可依違典泯默默固位已乎庶復
以堂上官禁止司屬爲得計伏觀大明律百工技藝之人若有可言之事
直至御前奏聞但有阻遏者斬百工技藝之人有言尙不敢沮况諸司百
執事乎堂官以身率屬教其報主不聞教其負主此古今通誼也陛下必
欲重百官越職之禁不若嚴言官失職之罪當言不言坐以負君誤國之
罪輕則記過重則褫官科道當遷一視其章奏多寡得失爲殿最則言官
無不直言庶官無事可言出位之禁無庸太平之效自致矣帝責其沽名
命貶一秩庶偕同列胡時麟等復交章論劾乃再降一秩爲湖廣按察司
經歷懋楨到職復郵奏安攘大計薦趙南星文武才宜用俞大猷車制可
試而並薦大將朱先郭成黎國耀等再上一疏極久之極南京通政司經歷

歷禮部主事以憂歸屢薦不起家居二十年始起故官進南京兵部郎中再以憂歸光宗立起禮部郎中遷光祿少卿天啓初爲太僕少卿四年遷太常卿命下而懋檜已卒子重燧字璧甫有田歲獲百六十斛悉畀諸弟博購羣書爲數大篋連楹作半航樓儲之且夕披讀有數囚論死廉其寃立白官出之又嘗在客坐有言某寃久繫者卽起離席去人莫測所如未幾引寃者至謂已白於官釋之宴飲如初山寇起重燧部署滅獲自捍一日被困幾殆見一人直前掖之出詢之卽昔日席閒所營救寃獄人也聞

書明外史

張廷棟字國材龍溪人萬曆庚辰進士授行人先後奉使諸藩贈餉一無所受嘗道經吳越間所知爲巡鹽御史有賈人爲仇家陷其子出白金求言於御史廷棟峻卻之然心知其父寃竟白而釋之而賈人不知也居職十年屏跡權門遷禮部主事踰月而卒廷棟性深純無疾言遽色事母至孝有不擇必免冠長跪意解乃起弟廷木篤於倫行隱居東郭亦嘗卻人

金爲白出死罪人問之輒曰無有廷榜字登材萬厯甲戌進士知太平縣
縣故荒樸廷榜爲民講律令設鄉約簡賦役集諸生日課得一佳語輒命
酒食相慰勞自屬草式之旁邑士皆來從遊遷鎮江同知以論文失權貴
意罷歸年方三十六晚而舟居浮家汎宅蕭然無繫人比之夏統張志和
云廷木子紹科初名煙字煙叔與廷榜子燮齊名黃道周始爲諸生卽與
其兄弟定交紹科長道周十歲道周罷官講學鄴山時紹科已老請執經
爲弟子一時驚相語曰此河汾王孝迥也然道周終以兄事紹科紹科學
博而精爲一時冠燮字侶和一作紹和萬厯甲午舉於鄉與蔣孟育高克正林
茂桂王志遠陳翼飛鄭懷魁等號漳州七子性灑落不思官達侍其父構
廬錦江之上怡然也天啓間何喬遠上疏薦燮預修實錄諸名士多以書
勸駕終辭不赴遠近稱爲徵君旣而黨禍大作燮獨飄然時比申屠蟠郭
有道知交遍海內而與道周尤善道周七不如疏謂志尙高雅博學多通
不如華亭陳繼儒及燮云燮子于壘字凱甫七歲賦明月小池平句爲名

流所賞十六爲諸生十七出遊名山撰述甚富卒年二十二郡人爲立幼清祠

柯挺字以拔海澄人舉順天鄉試第一萬曆庚辰進士授南樂知縣減徭徵鋤豪強盜不入境會入覲署事者獻盜七人皆誣服挺至察其寃密跡盜於清豐境獲之七人者皆得白擢御史十五年歲大祲疏請發臨清德州二倉穀二十萬石以賑巡按湖廣值鄖陽兵亂馳入境誅三卒以徇又平亂賊劉汝國等尋督南畿學政丁母憂歸樂建安山水移家焉

周起元字仲先海澄人萬曆庚子鄉試第一辛丑成進士知浮梁縣有大盜欲侵范仲淹雙溪書院起元持法不阿士論重之調南昌凡寇盜發他境來匿者悉捕得之行取入都授湖廣道御史奉敕巡漕賑滯疏壅公私便焉同鄒元標魏大中等講學京邸與東林相應和太僕少卿徐兆魁攻東林爲御史錢春所劾起元抗疏繼之又言陛下靜攝日久庶政有漸移於下而不覺者臣不敢瀆引僅以二三時事爲申言之賢令李嗣善坐罪

家釋滿朝薦功又在闕善上乃闕善獲宥而朝薦長囚蓋陛下之左右幽
系之也駙馬體統甚隆今冉與讓以被辱逃已聞顯罰顧婦寺負辜未聞
重創公主不能保其夫天子不能保其女蓋陛下之左右壅抑之也今以
四海之富加以礦稅之入三殿前樓累年不得報竣何也蓋陛下之左右
因以爲利也放棄諸臣其鯁直之性多爲奸璫所恨在廷一二宵小圖報
效於闕門者又從而媒孽焉是以有馮學之牘有說事之單有林下黨人
之歎蓋陛下之左右挫遏而沈淪之也然而禁良令辱戚臣糜土木錮忠
良之名則陛下受之矣疏入不省奸人劉世學者誠意伯劉蓋臣從祖也
疏詆顧憲成起元再疏極論下令捕世學世學始遁去吏部侍郎方從哲
出中旨起官起元力言不可福王將之國乞四川鹽井茶銀起元疏言頃
者恩詔凡鹽井有課無井者令撫按覈議豁免蜀人方引領望澤而可頓
墜德意乎福藩之富無容再益陛下聖子神孫振振方盛今日引潞藩以
爲例他日必有引福藩以爲例者陛下又將同之以槩爲賜乎抑異之而

斯其予乎陛下何不裁之以義教之以儉俾知國家有一定之賦分封無
濫乞之規事以師古法以制情其爲子孫黎民之利不亦溥乎不報尋巡
按陝西風采甚著卒以東林故出爲廣西參議分守右江道柳州大饑羣
盜蠱起時布按缺人屬起元攝事起元言於上官曰荒盜並告先急救荒
而徐議弭盜於是請支次年餉兵之半分官買米水陸遞運所過之地夫
馬兵徒之費皆以米支給饑民求食者令保甲編姓名給米全活甚衆招
降劇盜而密除其不受撫者四十八年移四川按察副使未上會遼陽破
廷議通州重地宜設監司乃命起元以參政蒞之潰兵散歸率呼諫有客
兵田景等擁衆相殺起元禽首惡遂不敢譁夫啓三年入爲太僕少卿旋
擢右僉都御史巡撫蘇松十府公廉愛民絲粟無所取遇大水疏請蠲賑
言蘇松常諸郡地形如釜底今舟楫往來不循河道每飛帆鼓柁於田畝
之間男婦巢樹而居人畜蔽溪而下見者垂涕聞者酸鼻周禮荒政十二
究之以除盜賊明荒之易亂也故弭亂莫如救荒救荒莫先賑濟今陛下

舉軍國最重最急之需待濟於江南而臣欲以江南最危最苦之情望澤於陛下似乎見一隅而遺全局然江南賦稅其輸將獨多江南安危其關係尤重是以凡遇災沴之歲厯沛浩蕩之恩誠以所賑者小而所保者大也疏入允行起元檄所屬買米江西湖廣平糶又力主漕糧改折吳民賴之因請疏吳淞白茆二江檄各鄉饑民盡赴工作所全活既多而水利亦興下部議未能行織造中官李實素貪橫妄增定額恣誅求又密偵富戶指爲匹籍吳中大擾起元上去蠹七事語多侵實故事惟織造通判以專轄用庭參同知於織監不相統皆客禮見蘇州同知楊美故強直實欲美行屬吏禮不從遂誣美誤運請逮起元再疏雪美且云織監而干參劾大權不特下逆輿情抑且上關國體魏忠賢庇實矯旨斥美爲民起元復劾實貪恣不法數事實以此威稍斂忠賢遂銜起元不置會分守蘇松道朱童蒙以擯外失職狂暴每行道輒鞭小民數十人血肉狼籍遂斃漕卒聞起元欲糾之稱病走京師起元乃列其貪虐狀以聞忠賢遂矯旨削起元籍

擢童蒙太常卿起元去吳人無老少皆隨之哭聲塞市六年二月忠賢欲
殺高攀龍周順昌繆昌期黃尊素李應昇周宗建六人取實空印疏令其
黨李永貞等誣起元爲巡撫時抑上供冒鼓鑄乾沒帑金十餘萬日與攀
龍輩往來講學因而居閒矯旨逮起元緹使至漳州漳士民大驚呼設木
櫃於郡四門投錢不三日錢滿復擁諸緹使相率泣言周中丞冤且貧有
欲爲辨寃者起元力止之曰臣之事君生殺皆恩嗚嗚者益增吾罪矣至
則酷刑撈掠九月斃之獄中吳士民及其鄉人無不垂涕者忠賢之禍名
臣先後慘死有前六君子後七君子之稱起元後七君子之一也莊烈帝
嗣位贈兵部右侍郎官一子賜祭葬特祠於郡學之西又允御史袁鰲請
與楊漣左光斗同建祠京師而江南廣西及通州亦皆有祠福王時追諡
忠愍

林材字謹任閩侯人萬曆十一年進士授舒城知縣擢工材給事中吏部
推鄭洛戎政尙書起張九一貴州巡撫材極言兩人不當用九一遂罷王

錫爵赴召材疏論井及趙志臯張位再請建儲豫教又爭三王竝封之謬
遷吏科都給事中劾罷南京尙書郝杰徐元泰經略宋應昌惑沈惟敬力
請封貢材乞斬應昌惟敬不報志臯位擬旨失當材抗疏駁之二十二年
夏六月西華門災材偕同官上言切指時政缺失帝愠甚以方修省不罪
吏部推顧養謹總理河道材論止之兵部將大敘平壤功材力誣石星罔
上星乃不敢濫叙其冬復率同官上言成憲不當爲祭酒馮夢禎不當爲
詹事劉元震不當爲吏部侍郎帝積前怒言材屢借言事誣謗大臣今復
暗傷善類乃貶三官餘停俸一歲會御史崔景榮等論救再貶程鄉典史
材遂歸壁不出光宗卽位始起尙寶丞再遷太僕少卿還朝未幾卽乞歸
天啟中起南京通政使卒崇禎初贈右都御史子宏衍以蔭官浙江副使
備兵溫台政稱平恕孫之蕃

之蕃字孔碩材素清介於物無所好獨寶一箕子鼎沒以貽之蕃巨室期
得鼎不可則探宏衍宮廨挾之之蕃償以所遺屋與田俱不可之蕃曰鼎

受之先人當告廟乃子期日召巨室子鼎之蕃抱鼎告曰孫之蕃不能守
傳器願與索鼎者同殉向巨室一擊巨室踉蹌竄去崇禎癸未第進士與
侯官林塗少同學舉於鄉成進士又同倪元璐並器之及謁選塗得海寧
知縣之蕃得嘉興又同省密邇也邑有鹽商特巡按御史李挺力奪故宦
墓之蕃導暑走百里驗山界具圖竟坐商罪挺怒以計典罷之唐王稱號
黃道周以之蕃與塗薦同日拜御史繼授之蕃考功郎中空文選郎中唐
王敗之蕃隱居唐嶼以畫自給後夢陳子龍以冠服招之疽發背卒

明史

明外史

葉向高字進卿福清人父朝榮養利知州向高甫妊母避倭難生道旁敗
廁中數瀕死輒有神相之萬曆十一年成進士授庶吉士進編修遷南京
國子司業改左中允仍視司業事二十六年召爲左庶子充皇長子侍班
有啟沃功礦稅橫行向高上疏引東漢西邸聚錢事爲鑑不報尋擢南京
禮部右侍郎久之改吏部再陳礦稅之害又請罷遼東稅監高淮語者切

至妖書獄興移書沈一貫力諫一貫不悅以故滯南京九年後一貫罷沈
鯉亦去朱賡獨當國帝命增閣臣三十五年五月擢向高禮部尙書兼東
閣大學士與王錫爵于慎行李廷機並命十一月向高入朝慎行已先卒
錫爵堅辭不出明年首輔賡亦卒次輔廷機以人言久杜門向高遂獨相
當是時帝在位日久倦勤朝事多廢弛大寮或空署士大夫推擇遷轉之
命往往不下上下乖隔甚廷臣部黨勢漸成而中官權稅開礦大爲民害
帝又寵鄭貴妃福王不肯之國向高用宿望居相位憂國奉公每事執爭
效忠盡上疏曰陛下每謂時事艱難臣謂陛下自爲難也今外廷章奏十
九爭中不得已轉內閣至有一事而數十揭愈瀆愈輕愈繁愈厭天下責
望臣彌重臣實病不敢言病欲去不敢言去不能爲又不敢言不能爲悒
鬱無賴中焦如火恐爲誤國之臣已矣又言南直隸浙江湖廣洪水滄沒
至今未遏百萬生靈流離顛播無還定之日而征榷之令未除土木之工
未艾織造之困未紓六曹九卿寥落不全今更疊續稱病求去太倉軍國

之命老庫久竭移用馬價罔藏俱空各處轉輸期不謀夕加以邊境頻警羽檄紛馳撫臣請餉計臣告匱彼此相顧不知所措言官條陳兵食概不見報國事如此臣惟有以七尺之軀還之陛下何能有它策哉帝心重向高禮貌優厚然其言大抵格不用所救正十二三而已東宮輟講者五年廷臣屢請不得命三十七年二月向高擇吉以請亦不報自是歲春秋必懇請帝皆不納貴妃王氏太子生母也薨四日不發喪向高以爲言乃發喪而禮官上其儀注稽五日不行向高復爭之疏乃下福王府第成工部以之國請向高擬旨上帝不發改明春及期迫向高請先飭儀衛舟車帝不納四十一年春廷臣交章請復論改期明春已忽傳旨莊田非四萬頃不行廷臣大駭向高因進曰田四萬頃必不能足王之國且無日明旨又不信於天下矣且王疏引祖制而祖制無有是事曩惟世宗時景王有之景王久不之國皇考在裕邸危疑不安此何可效也帝報曰莊田自有成例且今大分已定何猜向高因疏謝言皇考時名位雖未正然講讀不輟

情意通今東宮輟講八年且不奉天顏久而福王一日兩見以故不能無疑惟堅守明春期而無以莊田藉口天下疑自釋帝報福王無一日兩見事向高有裁斷善處大事錦衣百戶王曰乾者京師奸人也與孔學道宗辯趙聖等相訐告刑官讞未竟曰乾乃入皇城放礮上疏刑官大驚將疑曰乾死罪曰乾遂訐奏鄭妃內侍姜嚴山與學等及妖人王三詔用厭勝術詛咒皇太后皇太子死擁立福王帝震怒遶殿行半日曰此大變事幸相何無言內侍卽跪上向高奏言此事大類往年妖書然妖書匿名難詰今兩造具在一訛卽得情陛下當靜處之稍張皇則中外大擾至其詞牽引貴妃福王尤可痛恨臣與九卿所見皆同敢以聞帝讀竟太息曰吾父子兄弟全矣明日向高又言曰乾疏不宜發發則上驚聖母下驚東宮貴妃福王皆不安宜留中而別諭法司治諸奸人罪且速定明春之國期以息羣喙則天下帖然無事帝盡用其言太子福王得相安貴妃終不欲福王之國言明年冬太后七十壽王宜留慶賀帝令內閣宣諭向高留上

論弗宣請今冬預行慶壽禮如期之國帝遣中使至向高私邸必欲下前
諭向高言外廷喧傳陛下欲假賀壽名留福王約千人伏闕請今果有此
諭人情益疑駭將信王曰乾妖言朝端必不靜聖母聞之亦必不樂且潞
王聖母愛子亦居外藩何惓惓福王爲因封還手諭帝不得已從之福王
乃之國而莊田猶取盈四萬向高疏減其一又諷福王自辭其一向高嘗
上疏言今天下必亂必危之道蓋有數端而災傷寇盜物怪人妖不與焉
廊廟空虛一也上下否隔二也士大夫好勝喜爭三也多藏厚積必有悖
出之釁四也風聲氣習日趨日下莫可挽回五也非陛下奮然振作簡任
老成布列朝署取積年廢弛政事一舉新之恐宗社之憂不在敵國外患
而卽在廟堂之上也其言絕痛切帝知其忠愛不能行初向高人閣未幾
陳用人理財策力請禡缺官罷礦稅見帝不能從乃陳上下乖離之病兩
疏乞罷帝不允向高自獨相卽請增閣臣帝不聽及吏部尚書孫丕揚以
爲賢不用求去向高特疏請留亦不報遂引疾屢論乃出視事已又言臣

屢求去輒蒙恩諭留顧臣不在一身去留而在國家治亂今天下所在災傷死亡畿輔中州齊魯流移載道加中外空虛人才俱盡罪不在他人臣何可不去且陛下用臣則當行其言今章奏不發大僚不補起廢不行臣微誠不能上達留何益誠用臣言不徒縻臣身臣盍先朝露有餘幸矣帝不省京師大水四方多奏水旱向高又言自閣臣至九卿臺省曹署皆空南都九卿亦止存其二天下方面大吏去秋至今未嘗用一人陛下萬事不理以爲天下長如此臣恐禍端一發不可收也帝亦不省四十年春向高以歷代帝王享國四十年以上者自三代迄今止十君勸帝力行新政因復以用人行政請亦不報向高志不行無月不求去帝輒優旨勉留向高復言臣進退可置不問而百寮必不可盡空臺諫必不可盡廢諸方巡按必不可不代中外離心輦轂肘腋間怨聲積盈禍機不測而陛下務與臣下隔絕帷幄不得關其忠六曹不得舉其職舉天下無一可信之人而自以爲神明之妙用臣恐自古聖帝明王無此法也先是向高疾閣中無

人章奏就其家擬旨者一月及是向高堅臥益久卽家擬旨如前論者以爲非禮向高亦自言其非堅乞去帝卒不命他相遣鴻臚官慰留至帝萬壽節始起視事其後向高主癸丑會試章奏皆送閣中尤異事云帝考選科道七十餘人命久不下向高懇請數十疏越二年乃下言官旣多攻擊紛起帝心厭之章悉留中向高請盡付所司定其去留因言大臣者小臣之綱今六卿止趙煥一人而都御史十年不補彈壓無人人心何由戢帝但責言官妄言而大僚迄不補向高請增置閣臣章至百餘上帝始用方從哲吳道南向高疏謝因引退優詔不允四十二年二月皇太后崩向高撰遺詔明著分封典禮皆已定期鄭貴妃遣人來言曰先生全力爲東朝願分少許惠顧福王向高曰此老臣所以爲王也王乘此寵眷時改行宮中如山之積恣王所欲積年口語一行冰釋當得賢聲若時移事改嫌釁旣生危不自保老臣爲王何有不至貴妃感悟三月福王之國屬帝增閣臣方從哲吳道南向高旣送太后喪山陵禮畢累章求歸至八月允其去

向高以三載考績進太子太保文淵閣大學士敘延綏戰功加少保兼太子太保改戶部尚書武英殿一品三載滿加少傅兼太子太傅改吏部尚書建極殿至是命加少師兼太子太師賜白金百彩幣四表裏大紅坐蟒一襲遣行人護歸帝又傳旨留數日命賜其邑里山川以獻抵里後又遣撫按不時存問向高在相位務調劑羣情輯和異同然其時黨論已大起御史鄭繼芳力攻給事中王元翰工部郎中邵輔忠等向高請盡下諸疏敕部院評曲直罪其論議顛倒者一二人以警其餘帝不報諸臣既無所見得失益樹黨相攻未幾又爭李三才之事黨勢乃成無錫顧憲成家居講學東林書院朝士爭慕與游三才被攻憲成貽書向高暨尚書孫丕揚訟其賢會辛亥京察攻三才者劉國縉以他過掛察典喬應甲亦用年例出外其黨大譁向高以大體持之察典得無撓而兩黨之爭乃不可解向高乃歷舉君子小人之弊其言痛切帝知其忠誠然不能用又屢請增閣臣及疏留尚書孫丕揚皆不報求去益力曰臣蒙恩誦留數矣及後齊楚

浙黨人攻東林殆盡尋至天啟時王紹徽等撰所爲東林點將錄令魏思賢按氏名逐朝士以向高嘗右東林指目爲黨魁云向高歸六年神宗嘗語近侍此閣臣未嘗欺我一言壞我一事張差事起歎曰葉向高在朝必不至此光宗立特詔召還未幾熹宗立復賜敕趣之屢辭不得命天啟元年十月還朝復爲首輔言臣事皇祖八年章奏必發臣擬卽上意所欲行亦遣中使傳諭事有不可臣力爭皇祖多曲聽不欲中出一旨陛下虛懷恭已信任輔臣然間有宣傳滋疑議宜慎重綸音凡事令臣等擬上帝復旨報聞旋納向高請撥帑金二百萬爲東西用兵之需熹宗初政羣賢滿朝天下欣欣望治然帝本冲年不能辨忠佞魏忠賢客氏漸竊威福搆殺太監王安以次逐吏部尙書周嘉謨及言官倪思輝等大學士劉一燝亦力求去向高言客氏出復入而一燝顧命大臣不得比保姆致使人揣摩於奧窔不可知之地其漸當防忠賢見向高疏刺已恨甚旣而刑部尙書王紀削籍禮部尙書孫慎行都御史鄒元標先後被攻致仕去向高等

不得因請與元標同罷帝不聽而忠賢益恨向高向高爲人光明忠厚有
德好扶植善類再入相事冲主不能容直如神宗時然猶數有匡救給
事申章允儒請減上供袍服奄人激帝怒命廷杖向高論救者再乃奪俸
一年御史帥衆指斥宮禁奄人請帝出之外以向高救免給事中傅欐救
王紀將貶謫亦以向高言僅奪俸紀既罷去御史吳姓王祚昌薦之部議
以故官召忠賢怒將重譴文選郎向高亦救免給事中陳良訓疏譏權奄
忠賢摘其疏中國運將終語命下詔獄窮治王使向高以去就爭乃奪俸
而止熊廷弼王化貞論死言官勸帝速決向高請俟法司覆奏帝從之有
請括天下布政司府州縣庫藏盡輸京師者向高言郡邑藏已竭藩庫稍
餘倘盡括之猝有如山東白蓮教之亂何以應之帝皆不納忠賢既默恨
向高而其時朝士與忠賢抗者卒倚向高忠賢乃時毛舉細故責向高以
因之向高數求去四年四月給事中傅欐劾左光斗魏大中交通汪文言
招權納賄命下文言詔獄向高言文言內閣辦事實臣具題光斗等交交

言事曖昧臣用文言顯然乞陛下止罪臣而稍寬其他以消縉紳之禍因
力求速罷當是時忠賢欲大逞憚衆正盈朝伺隙動得搆疏喜甚欲藉是
羅織東林終憚向高舊臣並光斗等不罪止罪文言然東林禍自此起至
六月楊漣上疏劾忠賢二十四大罪向高謂事且決裂深以爲非廷臣相
繼抗章至數十上或勸向高下其事可決勝也向高念忠賢未易除閣中
從中挽回猶冀無大禍乃具奏稱忠賢勤勞朝廷寵待厚盛滿難居宜解
事權聽歸私第保全終始忠賢不悅矯帝旨敘已功勩累百餘言向高駭
曰此非奄人所能必有代爲草者探之則徐大化也忠賢雖憤猶以外廷
勢盛未敢加害其黨有道以興大獄者忠賢意遂決於是工部郎中萬燦
以劾忠賢廷杖向高力救不從死杖下無何御史林汝霖亦以忤奄命廷
杖汝霖懼投邊化巡撫所或言汝霖向高甥也羣奄圍其邸大譟向高以
前事不可爲乞歸已二十餘疏至是請益力乃命加大傅遣行人護歸所
給賜視藥與有加尋聽辭太傅有司月給米五百石與夫八向高既罷去韓

願朱國頤相繼爲首輔未久皆罷居政府者皆小人清流無所依倚忠賢
首誣殺漣光斗等次第戮辱貶削朝士之異已者善類爲一空云熹宗崩
向高亦以是月卒年六十有九崇禎初贈太師謚文忠向高在神宗朝善
因事就功廷杖絕跡國本既定朝野晏如及相熹宗時事益非嘗歎昔事
神宗以手代口雖甚觸忤怒亦卽平有請亦卽允今日與內臣角辯以口
代手雖勝必不繼無論不勝也嘗與元標言公講孔孟亦第講閹羅元標
問故曰不佞老矣填溝壑日近若有欺君傷人害物事於閹羅殿前對勘
不過皆不敢爲其語似諸要爲切實無欺斯爲善講孔子也子成學字汝
習以蔭入國學官尙寶丞福清故產鹽而近海者多業漁官設哨卒偵邏
私販因緣爲奸成學曰當事革鹽哨民因獲魁邑有峽江爲四郡通津風
濤危險請改渡於上流行旅糶便益蒸字君馨以蔭中書舍人遷南
京戶部主事陞郎中擢廉州知府府有四營給餉不時益蒸力請得以時
給而汰虛冒者秩滿當遷軍民遮道祖送卒於途

奈夢鯉字有徵福清人萬曆癸未進士知新建縣遷戶部主事練習曹事尚書甚倚之以久次擢廣東按察司副使遷布政司參政所至弭盜綏戩威惠並著以平黎功賜二品服進湖廣按察使未抵任告歸杜門養重不以片刻入公門邑人輸糧於衛爲攬納所詐率一石取五斗後遂改爲折色民便之而黠者相挾爲奸以危語動富道必欲復舊夢鯉獨抗言折色便力陳利害事得毋變邑人深德之

福清縣志

盧一誠字誠之福清人萬曆庚辰會試中式癸未成進士授行人歷司副司正卿寺貴人多假借私節行至不關白司正亦不敢問一誠曰奉使有專職胡可侵官具疏將劾之其人再三謝乃已使規大飭轉南京戶部郎中南曹多優暇獨一誠所治江西司最劇錢穀出納蠶穴其中一誠悉釐剔之同僚某榷城門稅適額增懼不中程議倍征尙書以問一誠一誠曰征商有定法胡可變也議遂寢其後有任子爲曹郎以榷稅嚴爲部民所訐尙書欲劾郎一誠言郎以持法劾法必廢廢法以徇下下必陵上不可

長也宜治訐者罪尙書不聽疏上竟如一誠言江西守臣移文爲南昌新建二邑請改折色邑多貴人莫敢難一誠言四方多故兵食日增虛廩庾以自弱非計力格其議居二年擢潮州知府潮故饒郡吏茲土者多墨一誠毫無所染上下交際踴躍如也有黠僚覓郡權多乾沒以其餘遺一誠一誠怒叱之臺使者知其廉欲以權事屬之一誠曰守奈何奪丞俸職稍爲稽核而已俗喜訟卽贖金足潤橐一誠受詞甚簡且多寬釋歲贖不數金亦竟不入橐也旋告歸郡人稱其深操峻行爲守潮者僅見一誠爲諸生時值倭難作諸武人率繁僂良民邀功族鄰數人在繫中且就刑一誠入見督撫具白其枉竟得釋士論壯之篤嗜經書及宋儒語錄手爲訂隲爲文根極理要不事雕飾南京士大夫結社談學皆宗王守仁或招一誠謝不往曰吾不能操戈入宋人之室也晚歲居會城道山麓有朱子石室清隱題字杜門著述學者奉爲指南云

林道楠字廷任莆田人萬厯癸未進士知進賢縣歲饑發粟乘小艇徧厯

窮鄉計口賑給夜則就舟宿不入民舍每奏假饋散種復爲築官圩以資
澆會丈田躬自履畝分則定賦雖勢豪不少徇召爲御史歷按應天陝西
廣西不受私囑陝西供食皿皆用銀道楠請之從人曰例也且防酖道楠
命撤之曰吾以恩信待人何防之有待郎某以其所親郡守爲屬守墨甚
彈罷之在臺十八年劾太監張鯨抹御史曹學程論尙書石星王封事著
丰采遷太僕少卿以封藩道卒家貧其二子單步走食四方海內益重其
清素進賢人祠祀之 以上道光舊志

李廷機字爾張晉江人貢入太學舉順天鄉試第一張居正延之教子辭
不就萬曆癸未會試復第一殿試第二人授編修十四年夏持節封趙藩
過家置義田葺先墓十九年典浙江鄉試卻一切饋贈累遷祭酒故事祭
酒每視事則二生共舉一牌詣前大書整齊嚴肅四字蓋高皇帝所製以
警師儒者廷機見之惕然故其教一以嚴爲主二十五年陞少詹事兼侍
講學士其年遂遷南京吏部右侍郎署部事與京察無偏私嘗嘗言工二

部事奏行軫惜行戶四事商因大蘇外城陵垣多所繕治費皆取公帑奇羨不以煩民召爲禮部右侍郎四辭不允越二年始受任時已進左侍郎遂代郭正域視部事會楚王華奎因正域發其餽遺書誣訐正域不法數事廷機意右楚王而微爲正域解大學士沈一貫欲借妖書傾正域帝謂妖書實出正域手正域危甚會緹騎緝得繳生光者坐之衆在疑信閒御史沈裕言於厥璫曰事不決指紳荼毒矣廷機是裕言生光亦慨然承伏獄上株連遂絕三十三年夏雷震郊壇率同列條上修省事宜復言今日闕失莫如礦稅宜罷不報其冬復類上四方災異以聞廷機精簿書以王府事多叢奸不可詰乃定爲簡要法有請立奏吏無所容私諸宗德之爲立生祠四區秦王誼憑由中尉進封其庶長子應授本爵黃緣欲封王廷機三疏力持王遣人居閒廷機固拒益府服內請封亦持不可抄明史孫王廢長子鼎涓立愛子鼎莎廷機爲侍郎時王之嘗革貢夷車價罷高麗其後羣臣爭者百餘疏帝不省此廷機之失當者戊卒自言以一介窮儒變科華貴當思所以報稱答國恩無使死之日有

餘粟餘布以累君父帝知之值朝觀之歲帝謂左右曰此時惟趙世卿李廷機甚聞謂兩人不與外夷接也時內閣止朱廣一人三十五年夏廷推閣臣廷機與焉初一貫罷言路爭擊其黨而廷機一貫教習門生也給事中曹于汴等攻之至詆為輦金輿援帝雅重廷機命以禮部尚書兼東閣大學士三辭始視事廷機拜命謝恩疏言人臣惟知有主苟可以自致於主者無不盡益於王者無不為不知有家不知有交遊往來不知有毀譽得喪必無一念不可與主知必無一念不可對主言自是而外有不可則止之訓焉廷機雅慕清淨畫一之理省議論明職掌遵甲令而是時士大夫重氣誼尙建白時時軼越所守官廷機不喜之居九月言者蠱起江西參政姜士昌御史宋燾復以論廷機被黜羣情益憤京師久雨壞田廬給事中汪若霖復言大臣比周相倚小臣趨風其流益甚意復詆廣及廷機也南京御史王霖言廷機每遇票擬必遣僕偵探葉阿高為疏辨之都給事中蕭近高極陳言路不通耳目壅蔽中言閣臣廷機身為射的宜令引

退廷機力辨求罷又疏陳十宜去帝慰諭有加明年主事鄭振先論廣十
二罪并及廷機廷機累疏乞休杜門數月不出言者尙疑其僞數十人交
章力攻廷機求去不已帝屢詔勉留且遣鴻臚趣出堅卧不起待命踰年
乃屏居荒廟廷臣猶有繁言至四十年九月疏已百二十餘上乃陞辭出
都待命同官向高言廷機已行不可再挽乃加太子少保賜道里費乘傳
以行人護歸居四年卒贈少保謚文節廷機繫閣籍六月秉政止九月無
大過言路以其與申時行沈一貫輩密相授受故交章逐之輔臣齟齬受
辱屏棄積年而去前此未有也給事中陳友伯謂廷機去國操縱不出上
裁云廷機輔政時四川巡撫喬璧星銳欲討鎮雄安堯臣與貴州守臣持
議不決廷機力主撤兵後卒無事議者稱之雖爲黨論所攻而清節確然
不可得而誣也方在政府時其仲弟布衣也自家往省以方巾鮮衣見詰
其所自曰應舉乎納粟乎皆曰否否廷機曰旣不出此則誰不知我弟爲
布衣而顧易冠服乎杭州爲八閩孔道未見有李閣老行李僮僕者卒之

日所遺藥中四十四金語妻曰以此治木治腹泉州知府蔡善繼廷機所
舉士也以杉枋二木請擇妻辭不獲已乃納其次者人謂廷機之清能行
於妻子矣閩人入閣爲相白楊榮陳山後以語言難曉垂二百年廷機始
與向高並命後史繼偕周如磐張瑞圖楊景長林鈺蔣德璟黃景昉相繼
入閣云 閩書明外史

李開芳字伯東永春人祖陽初謙謹若不勝衣幼孤事繼母至孝母歿哭
之傷肺病疇終身嘗築陂以資鄰里灌漑贖族人一鬻子爲之婚娶比陽
初卒所贖子服如所生父應元字思貞萬曆中貢生親老無意仕宦一詣
太學不數月遽歸鄉人有爲吏部郎者強留之不可人稱其孝開芳萬曆
癸未進士授戶部主事歷遷至江西按察使時中使入江西督礦稅首及
廣信其爪牙橫甚上饒知縣李鴻捕數人杖斃之中使怒露章疾馳撫臣
慮波及將繼劾開芳曰果爾海內視公爲何如人請劾某而置上饒撫臣
慙而止進布政使擢南京太僕寺卿歸邑有永寧衛之例屯田皆輸本色

開芳與從弟開藻力請於官乃免軍民德之

開藻字叔元少學於兄開芳弱冠與兄同成進士亦授戶部主事權許墅
關每歲冬十日開關恣出入商民便之擢山西按察司僉事領提學署其
堂曰天下事私難而公易曲難而直易吾爲其易者而已有御史父嘗官
山西欲求祀名官開藻判其贖曰雖有褒逝之舉豈無諛生之嫌與御史
大忤遂拂衣歸再起山東提學終江西提學副使告歸開藻在仕途清聲
著聞然不樂進取實以奉父之故父歿哀毀踰禮起江西提學南京尙寶
司卿俱不赴再起太常少卿未就道而卒家居父子兄弟日以詩章唱和
相娛樂縉紳聞侈爲盛事

以上閩書道光舊志

林寅賓字爾亮晉江人第萬曆癸未進士授行人凡三奉使所至屏絕餽
遺擢御史巡撫宣大閱視邊防舉劾不爽三年邊關晏如疏陳邊郵要務
建常平倉定軍馬錢糧經制又奏墾荒田千八百餘畝免額外新糧請蠲
賑以恤災復赦諸疑獄重辟及貧民贖之不能具者帝嘉納之有以常

例金三千進者封還府庫還朝上疏勸帝勤視朝親宰輔召還斥逐諸臣時論題之遷廣西參議會有岑溪之役籌策安撫中外帖然卒於官

李獻可字堯俞同安人萬曆癸未進士除武昌推官臬掾有犯法者臬長爲緩頰不得故相張居正獄起當事者雪下石獻可言故相自取戾其老母弱稚奚辜應坐者籍之而曲宥其姻黨徵授戶科給事申值帝弟潞王之國疏請謨訓宜遵左右宜選疆理宜正僕御宜戢在途無以擾困民在國無以縱敗禮疏入皇太后大怒令帝速譴之帝心知其讜論越日帝謙宮中自袖疏屬近侍曰此戶科李給事中疏勿失也南京兵部侍郎王卞貞疏請先師廟用天子禮樂而於十哲兩廡之祀有所訂定獻可言祭用生者之爵國學天子釋奠及遣官行禮宜僧入盥豆十二至郡國主祭者人臣也仍若侯禮便十哲可進南宮迺而再求宰予不必降雨廡可登范仲淹而歐陽修不必黜世貞亦心服其言又請發內帑以賑饑饉決章奏以防壅蔽伸法紀以全安攘皆鑿鑿中窾轉吏科刑科遷禮科都給事中

甫三日偕同官疏請皇長子出閣講學言册立猶可或需講學不可不取
我朝列聖最稱宣孝二廟二聖講學皆以九歲今皇長子年十有一矣豫
教之典宜及首春舉行乞陛下妙選孝弟博聞道術之臣以充輔導之選
疏入帝大怒摘疏中誤書宏治年號責以違旨侮君貶一秩調外餘奪俸
半歲言官相繼論救帝怒加甚獻可等遂廢於家天啓初錄先朝言事諸
臣獻可已前卒詔贈光祿卿

劉會字逢甲惠安人父錄字廷紀爲諸生孝事父母纂述疏義教授生徒
人慕其型範會第萬厯癸未進士知蕭山縣建西興石塘及龍口閘捍海
田數千畝民祀於鎮海樓入爲御史疏請建儲及皇長子講學巡按廣東
便宜發賑以緩金置義倉移按雲南礦役方輿闕瑄橫甚會以法持卒罷
瑄出爲江西參政二年乞休歸按廣東時過家值倭警以久入人民籍寺田
增價至萬七千民弗堪卽走白當事悉從蠲免里人德之弟春

春字望奎萬厯丁未進士授工部主事巡視皇陵劾諸皇親冒費省內供

數十萬厯兵部郎中出知衡州府衡錢法不行春力爲疏通民甚便之有
地稅釋冤獄有悍弁倚勢害人法繩之奸民附藩府官校籍採礦召集亡
命數百郡中震恐捕治之嘉靖閒知府胡某絕湘造浮梁未幾圯春修復
之又議設官舫以省驛馬有中梗者乃止陞江西按察副使未上卒於家
從兄詢英

詢英以貢生知分水縣能刻苦自持邑有三蠹赭山者胥篋者圖賴者詭
英皆屏絕之歲蝗且旱取蝗吞之因而齋禱果大雨以介鯁忤當道罷徒
步抵家行橐惟圖書數卷而已分水人祀之名宦

龔雲致字潤寰晉江人萬厯癸未進士授御史巡長蘆鹽時潞王請以彰
德衛輝屬藩府雲致力阻之故事御史謁潞府行拜門禮雲致移文長史
言拜門乃天子之儀不敢陷殿下於失王爲出朝賜宴及幣一如藩封例
厯官至雲南僉事致仕歸邑南泮有塘周圍三十里溉民田八千畝歲久
隄岸崩雲致捐貲盡築以石人德之

吳龍徵字堅孺晉江人父喬柏字子壽家貧純孝父母繼沒廬墓十年嘗過南安錦亭獲遺鏹二百俟其人還之嘉靖閒倭變老穉避亂者多饑餒每分餐之李廷機爲作傳龍徵第萬厯癸未進士改庶吉士授御史出督漕運官旗運艘率附載杉木雜物艘重往往敗事龍徵論劾指揮二十五人適颶風發艘輒得濟尋巡按山東黃縣民訟其令訊得諸墨狀疏褫令職有豪紳子爲暴於里訟者十而五方飭訊而都御史某書至龍徵卒置於法還朝疏乞寬宥建言諸臣後遷河南參議都御史某中以察典謫歸尋起通州州判擢南京戶部主事歸卒

以上道光舊志

林國相字廷贊號變軒閩縣人萬厯癸未第南宮再踰年授戶部主事權稅崇文門一錢不入私橐督儲江南鹽大診疏請改折民賴以甦故事列邑斂金錢爲使者費多者至百餘緡國相悉裁罷之在曹五年甚有聲出守惠州屬典郡久闕獄滯奸滋國相下車次第決遣旬日間通牘悉清惠俗婚姻無媒妁以檳榔爲信輕相背負無日不訟國相取六禮條布之不

率者刑又嚴禁婦女之爲市者俗乃大更郡故多盜國相捕其渠魁論如
法廣設方略控制之境內遂安道紀聶日升亡其印訴於國相國相笑曰
爾無恐也其歸索之神座下已果得印如言人驚以爲神居恒好獎進諸
生貧不能婚喪者皆有助學宮獎懷蠲貨飾之下及橋梁道路陂塘渠堰
皆加葺治惠人戴之呼以青天當入計藏吏請以贖緩百三十緡爲道里
費却不受留供郡志湖堤二大役計畢遷河東運使河東鹽產池中與煮
海異每苦旱潦損課國相在事有天幸課倍往時中使垂涎侵利權疏請
得報爲御史所持紛拏不解乃爲之畫分課鹽餘鹽以餘者輔內帑爭乃
息其年池鹽不生上聞之召中使歸十月鹽復生往鹽生必於春夏十月
非其時也民因號曰瑞鹽而以爲國相所感致謝不居鹽政之暇葺學宮
立育才館興社學孜孜教士又創士倉以贍其乏修圯橋建麗譙凡所興
作多割已資至日用供億亦分毫不爲民擾居河東六年中丞臺使者交
章薦卓異仍請徙晉藩從晉人望章三上乃報可以左參政分守河東晉

人大喜河南凶國相檄所部寬催科間疾苦發倉煮粥所全活甚多嘗兼攝分巡事裁決沛然案無停牘未幾以入賀行主吏請括贖緩郡縣循故事有所獻遺皆謝罷之既竣事則疾驅歸省行至桐廬病亟乃作書慰父母且云必得一見抵家之日口不能言以目視父母而瞑年五十四國相居官常不以家從與二弟聯床共被自相師友將二十年既宦遊各方問訊無虛月常慕司馬溫公之爲人取其可對天知可對人言二語頗其辭曰二可所著詩文如遊吳草燕粵吟河汾草等共若干卷

著霞草

鄭瑞星字廷奎仙遊人萬曆丙戌進士知信陽州有巨室以獄求解不從忤富道改調崖州峒蠻久爲民患瑞星恩威並用咸歸化遷刑部員外郎祭酒范應期被禍死妻擊登聞鼓訴冤瑞星力爲代白朝論躋之轉郎中三殿災瑞星按羣瑤以法羣瑤交擠之左遷贛州通判贛關稅爲大瑤所攘瑞星奏請歸郡商舶數患盜劫瑞星擒賊首陳注華等殺之自是行旅無虞以終養歸

黃汝良字名起晉江人萬曆丙戌進士改庶吉士授編修遷南京國子司業改北有國子生爲巨璫私人偃蹇無狀汝良欲按之則挾巨璫書至汝良曰國學四方觀型司成無與中涓通書例如法懲之會太白晝見地震陝西五山突出上疏請修省並責政府言路陞論德充東宮日講官每數引古今隨事披陳東宮喜動顏色歷遷禮部侍郎天啓初條上十策鄒元標稱爲救時碩畫當事者忌之出爲南京禮部尙書乞歸五年起北禮部尙書掌詹事府持論侃侃力保善類魏璫銜之又乞歸崇禎四年再起故官疏言楊漣左先斗諸臣宜加贈卹要典亟宜焚燬陛見又陳時務八要時朝政操切汝良力言犴狴填溢致干天和請釋諫臣吳執御王績燦吳彥芳等不報召對文華殿言加派疊征民不堪命帝頗納之朝鮮貢使與民貿易廠役需索不如意遂以上聞命搜索違禁諸物汝良引春秋及班超語請祖宗懷柔遠人搜索非禮帝從之六年進昭代樂律志命宣付史館備稽考未及施行尋致仕卒贈太子太傅子慶星慶貞

慶星字俞平天啓初副榜貢生授國子典簿遷順天通判中官貸錢取息於民慶星抑之成晚傅國柱奪民田三疏糾之擒巨盜李海鈿畿甸肅然育馬氏女新寡前妻女若婿盡攘其貲女到死諸司莫能理其冤慶星按法論治改南京戶部主事抗疏論兵事纒纒數千言皆切時務歸省卒於家

慶貞字俞正崇禎中以薦授翰林待詔屢抗疏言時事頗見嘉納擢職方司主事益激昂敢言時不能用尋侍養歸詩文俱雋贍瑰奇

楊道賓字惟彥晉江人父敦厚嘗爲含山典史有保障功邑人祀之移青田主簿歸道賓第萬厯丙戌進士第二人授編修進國子監司業累遷庶子充東宮講讀妖書事起御史康丕揚希大學士沈一貫指陷侍郎郭正域道賓與詹事唐文獻等詣一貫爭之李廷機亦力爲之地獄始解晉國子祭酒嘗病文體飢餓著崇正錄以示懲戒又定射禮儀節布之澤宮暇日一臨校士會春月疏請東宮行齒胃禮不報表進三國志五代史言漢

閣豎不肆於朝三國豈至分爭唐蓋藏不竭於外五代可無擾攘蓋其
代事諷諫也進少詹事禮部侍郎掌翰林院事充經筵日講官道賓且入
視曹事暮歸撰講義證古切今於成敗得失之林尤反覆申誠改掌部事
嘗因星變請釋逮繫知縣滿朝薦等又請亟舉朝講大典皆不報南京大
水疏陳時政略言官中夜分方寢日旰未起致萬幾怠曠請夙興夜寐以
圖治功時御便殿與大臣面決大政章疏及時批答毋輒留中及從內降
帝優旨報聞會帝萬壽節道賓緣華封三祝之意推而衍之請帝勵精圖
治所以爲受天之壽命東宮諸王出傅所以爲受天之多男捐爵出祿修
廢官補大僚所以爲受天之福時皇子輟講四年道賓又言太子天下根
本培養宜厚豫教宜勤宋臣程顥有言與近習處久熟便生褻慢與士大
夫處久熟便生敬愛此確論也宜亟渙玉音卜期開講因又引唐宦官仇
士良語爲戒其冬天鼓鳴道賓言視聽在民今民生顛躓無所赴愬天若
代爲之鳴宜急罷礦使更張闕政以和人心帝皆不聽謚典久闕道賓言

國初大臣議祭議葬無不卽與後請乞紛紜乃令會議類奏若不及時區別將來者舊不存事跡湮廢揣摩任意毀譽失真豈國家慎重褒賢之典哉宜下部臣以三年或五年爲期博採公論酌擬奏聞昔爲成規從之卒官贈禮部尙書謚文恪嘗下第聞兄負錢流落南京道賓亟往代償所負奉兄歸旣授編修值妻喪有中官貴幸用事者其弟官錦衣欲以女爲道賓簪室且以十萬金爲奩具道賓曰某貧士一旦登第何敢以執金吾女爲側室哉固辭使五往反乃止無何中貴人及錦衣俱敗嘗作箴自警謂貴常可賤富常可貧須立定腳根我不必是人不必非須剖破藩籬性命爲輕名節爲重須審度時位名利非求可得禍患非避可免當勘破機關箴成遂爲絕筆詩文溫粹典雅書法迥秀尺牘之美流傳海內以爲褚遂良趙孟頫復生也從兄道會弟道恆

道會字惟宗隆慶戊辰進士知黃巖縣息訟緩徵待民以誠擢南京戶部員外郎改工部尋權木南關張居正會同四方人情向背以告道會至關

第報說事日期而已居正病尙書及諸曹屬出金爲禱道會不與名出知
安慶府移台州府責嚴其屬縣也將至民襁負迎道三日不絕值歲荒奸
民以告羅爲解空其大家困屢道會擒亂首眞法黨立散遷廣東按察副
使巡撫傲視之投學歸居二年起爲其省提學時臬僚多缺印悉委道會
視學之外兩平府江岑溪竊歎曰屈雖平乎吏墨而賤豪蠹而侵夷未控
告張其指嚙乃亂本也及夷不得加以招招不來生其玩玩莫制昭以利
陷無厭肆其驕而大征舉矣夷可哀也吏與豪執問之遷湖廣參政提督
太和山治鄧陽太和山香瑤故與士大夫爲難道會佯好之他日稅瑤陳
奉奉旨至滯鄧旬日太和瑤遣謂奉曰楊公菩薩位人元神殛公矣奉佛
佛去之襄樊日爲暴又去之武昌武昌民變毆其黨沈之江帝召奉還使
趙可懷巡撫湖廣道會攝按察使可懷窮治瑤黨下訟牒三百於道會道
會言奉黨多不過百十人其爲指名者已繁今訟牒多若此率齟齬有力
此引宿學者也可懷收還牒無何乞歸時已轉右布政使而楚宗獄起可

懷被殺卽家趣道會倍道之官諸宗已就檻諸司尙窮治不休道會言楚宗始起事者已坐罪若株連恐生他變乃列上罪狀爲數等得旨允行又語巡撫誅戮之後宜停楚刑一年以示寬巡撫奏上亦報可道會復歎曰楚氛之起國戚幾頓幸纒斯長亦因諸公操之太甚合某在事富不其然奇轉入覲乞歸許之道會平生不齒榮利未嘗一失足於權貴門論爲官則曰官非身有行則爲姤姤遇也止則爲復復故也論馭吏曰不受餽論待民曰無擾之論治官曰與革弊莫若興利與嚴下僚莫若詳自治論學曰古人學問隨地精察大德不踰據德也小德出入游藝也道哲字惟衷少有志用世不遂乃沈酣道味作譚真子自許雖未窺聖學之奧亦可比於諸子百家焉

林欲廈字從真晉江人初以舉人爲睢州學正萬曆丙戌第進士授戶部主事歷知饒州府郡介湖多盜獲其魁盜乃息淮王自變樓帖寵觸法欲廈斃之懸擢至副都御史巡撫廣西武靖州故大藤峽地峽平置州官以

士酋岑鐸爲之岑氏世暴其民三繼三絕而田州泗城各垂涎其地欲厲
言岑先非款附無捍藩功天殄之矣乃請改州爲鎮隸桂平移潯州通判
使治之文陞黎莫二氏等其黨京犯上下思石州攻殺長更欲原檄諭二
氏令各攜送黨以獻乃更流言款不可恃請留兵餉爲後計南寧苦交趾
上下二石州當其衝請壘之當用額兵五百人合千餘往來戍守梧州總
督開府地也故有土司諸兵更迭戍今歲久安輯請量移諸兵屯要害左
江距省會遠省會主將坐制之鞭長弗及兩冬春駐南寧如邊防秋海防
汎故事旨報可三殿大木徵材於雲南而徵價於廣西欲屢上疏爲粵人
請命得蠲免又請蠲礦稅秩滿五疏乞老詔加工部侍郎歸欲屢少矜名
行能刻苦居官和平誠懇邊徼夷酋咸奉約束焉

劉宏寶字公可晉江人萬曆丙戌進士選庶吉士授戶科給事中疏請敘
錄得罪諸臣以振士大夫敢言之氣進工科都給事中察視水衡錢括故
貯不能逾百萬而一歲所出贏十六萬有奇歎曰是不數歲糜盡矣諸令

甲所不亟一意撙節時執例與中貴人力爭江西因陶器三吳困織造徐淮上下瀕河地患水宏寶請陶器無徵奇巧織造少紓其期河隄潰亟宜復而瀕河開墊溺蕩析不得已驅之版築請厚僱直佐之時陶器之徵一歲中至五六下宏寶亦五六執奏治河言人人殊宏寶請卽治河大臣折衷之諸請復故道及請浚七百餘里陸地別通漕者語皆調甚宜一切報罷科臣遷轉一內一外以爲常宏寶當得內自請外補出爲浙江參政會有言河水被淮泗侵祖陵帝切責治河大臣部覆波及宏寶坐謫潮陽典史卒於家天啓初贈太常少卿宏寶清介仁厚粗糲蔬布終其身常手鈔薛瑄讀書錄言行一票之孫鱗長

鱗長字孟龍萬曆己未進士授工部主事值皇極門及潯滄之役中貴浮揭石工至三十萬鱗長以六千金竣事復有保橋運石揭至四十萬鱗長議從橋下拽運費可省尋筦滄道事提督乾清宮太監王體乾侵市屋卽毀之又清追五城官房賦畹及大瑞所占據者忤魏璫意削職歸崇禎初

起原官遷員外郎司節慎庫臺省侵權擅支放鱗長力折之坐累逮詔獄
謫常州通判適孫慎行倡學東南鱗長師事焉署崑山知縣除隸役之虐
民者父老肖像祀之擢南京部主事歷遷浙江提學副使陞四川參政張
獻忠據全蜀惟遵義未陷樊一衛與王應熊避其地巡撫馬乾復重慶獻
忠命養子劉文秀攻之鱗長與副將曾英自遵義至與諸將于大海等夾
擊破賊兵數萬尋棄官歸卒於家 以上道光舊志

何喬遠字穉孝晉江人第萬厯丙戌進士除刑部主事歷禮部儀制郎中
神宗欲封皇長子爲王喬遠上疏言恭釋祖訓震器不可以久虛國本不
可以徐定議竟寢石星主封倭而朝鮮使臣金晬泣言李如松沈惟敬之
誤致國人束手受刃者六萬餘人喬遠以聞言封倭之不可在廷諸臣羣
謀僉同星乃敢逞臆飾非與諸臣較逆觀之明角前知之見臣以爲欲徵
後變當觀已敗方東事之起也舉朝謂倭狡而善戰鋒不可當不如量助
金錢畫江守之星攘臂自奮越國餽糧喪師異域此一敗也侍郎宋應昌

鄉評物望無一可許舉朝謂不足與計星請遣經略前後跋扈而歸此二敗也沈惟敬市井無賴小人言何足聽星任其欺弄此三敗也且嘗請太倉之儲造戰船矣遣人說暹羅代倭爲內應矣遣人航海鎮探關白動靜矣迄皆虛費妄行毫無左驗自有東事以來無一舉動足快人意則推之後事不問而知其償也因進累朝馭倭故事帝頗心動而星堅持已說疏竟不行肅王薨其子請襲賄中貴得封喬遠力言藩府宜終三年喪拒所請中貴無以難然恨刺骨鄭世子載堉辭爵議封子翊錫以成其讓晉藩新種新桂當封爲猾胥所抑冒給月餉立覈故牒答吏還其封屬進宗室名封本紙尾忘署名坐奏牘不恭例停俸中貴緣前憾謫廣西布政司經歷遂歸光宗立召爲光祿少卿移太僕少卿王化貞駐兵廣寧主戰與熊廷弼議不合葉向高方再相化貞座主也頗右之廷臣惟喬遠有廷弼言宜專守廣寧無何廣寧竟棄喬遠遂與他寺少卿馮從吾董應舉朱一桂許惟新等疏請逮治當時傳爲五少卿疏天啓二年進左通政山東

妖賊數萬攻陷城邑疏言赤子無知請乘大捷之後招撫赦宥從之時朝
士欲聲李可灼紅丸弑逆之罪喬遠引李宗定李汝清穆宗定金傲等罪
爲議人謂其識大體鄒元標建首善書院朱重家等劾之喬遠言書院上
梁文實出臣手義當并能旋進光祿卿疏薦同縣李光縉永春李開芳同
安黃文照海澄丁玉明龍溪張燮及華亭陳繼儒遷通政使五疏引疾去
以戶部右侍郎致仕既歸橐中無一金居鏡山講學戶屢益滿魏忠賢煽
虐屢欲起之以收人望堅不赴鄭芝之龍猖獗海上潛兵入城惟鏡山前後
十里戒勿動喬遠開誠曉諭欣然就撫李魁奇再叛鐘斌羽翼之益咆哮
喬遠馳至同安委曲譬諭魁奇等悅首去崇禎二年起南京工部右侍郎
請開鎮江練湖通運道帝令兼署戶部疏請清冗役考倉期又陳經費致
匱之由并言年輸淮庫二十萬金非舊例有旨按勘而忌者側目給事盧
兆龍劾其衰庸遂引去臨行復請開海禁謂弭盜安民莫先此舉喬遠終
始四朝後先一節安貧樂道鞠躬厲行與人交洞見肺腑里居多年益博

覽好著書嘗輯明十三朝遺事爲名山藏又纂國書百五十卷行於世善
飲至數百杯不亂當典試山西還朝一榜諸生聚餞於郊爲人酌三巨觥
世傳爲佳話卒贈工部尚書賜祭葬子九轉九雲九說再從子夢駿
九轉字翁悌爲諸生好學取家藏書讀之手撮其要爲砭庸錄巡按御史
行部集講有慢色九轉請在上位不陵下二語意頗激切御史以爲敏容詩
又清和博達揮毫立成小楷精迥學晉人草書奔放淋漓兼得蘇美筆意
又豪於酒年三十卒

九雲字舅悌崇禎癸未進士選庶吉士未第時以所得恩廕讓其弟嘗過
揚州使爲父門生馳書相問淮南欲賞緣納賄九雲曰奈何以不肖之
行辱我乎由漳平教諭陞應天教授南京士習尙意氣喜與富道爭九雲
多方訓誨士風爲變又增祀鄉賢中允景暘以下十人既登第或謂宜見
政府謝曰某平生不敢喪其所守未幾甲申變作南歸葬父畢杜門不出
初九雲崇禎聞以舉人爲教諭捐俸建陳布衣真履福賜廩稅以供歲祀

又於東山寺側構堂講學置學田每得奠必親務豐潔前後居官者鮮有
其匹

九說字兄恂以寤授太常典簿襄役德凌受銀幣之賜樂舞生糜月廩二
千石九說汰數百人晉太僕丞改南京戶部主事監水兌先是南糧解役
有候數年不能給通關者九說隨收隨給役困乃蘇進員外郎孝陵衛設
護軍六千令甲凡年老物故其親屬應補者未經科道給牒不許開支至
百歲之軍亦隨例支給九說按籍稽覈清汰可二千人指揮千百戶多虛
糜廩祿言於尙書請選擇用之不果行擢永昌知府明年京師陷福王立
南京九說上疏乞崇儒臣從祀舉公論最嚴者三人曹端吳與弼蔡清不
報尋卒年三十四

夢駿字履梯喬遊之子也

喬遊見
孝義傳

萬曆甲午舉人授三水知縣始至視庫

空虛衆驚駭夢駿察椽柱爲蟻所齧土異色而墳起取土令鍛之獲白金
如故額邑賦重又爲盜藪嚴捕緝禁誣訐追徵無羨餘民得安業遷常州

通判攝宜興知縣值編審以實產定徭賦凡詭寄搜剔殆盡請託不行豪
右簪服被議改太倉州判遂歸 以上明史道光舊志

洪澄源字子定晉江人萬厯丙戌進士授戶部主事歷郎中權稅崇文門
督通州倉監江西漕皆著清節出知桂林府御離商關引金革府吏加掾
入資者又革屠牛肆之納餒者歲不下千餘金屬軍興餉乏議者欲更舊
解贏入縮出所展不資澄源謂以一時小利百世受害力爭得免入覲父
老爲哀千金佐費謝卻之擢貴州按察副使備兵畢節爲宣慰安疆臣所
轄部強羈縻之澄源外制以法內推心置之疆臣以是畏服播酋楊應龍
爲變朝廷出師征之命疆臣出兵助戰巡撫郭子章屬澄源監疆臣軍疆
臣與應龍交內懷觀望數張皇撼澄源不動疆臣知不可恐喝遂
進兵大勝播兵於大水田斬首萬餘級復燒之於桃溪循應龍敗亡入海
困於是疆臣獻計請鑿開後路以進海泥險阻踰月至其處應龍授首先
是征應龍時懸賞格許平賊卽以其地償安氏既賊平地未及償而安氏

有叛目輸安氏情於總督謂其侵播州沙溪渭河之地總督責安氏議正疆界安氏謂沙溪渭河本水西故地且謂許地未償件削故部以益播忿不受命諸監司密釋歸安氏境莫解總督乃檄澄源單騎往諭令其地屬焉者歸安屬播者歸蜀其屬播而爲安近地要害者輸納糧賦安氏遂免首服夷酋奢世績世統爭裝構兵疆臣陰助世績總督復令澄源馳諭安氏無助亂兵立解還廣西參議擢貴州按察使陞雲南右布政值阿克之變圍會城澄源日夜守禦以勞卒當遷官時疆臣餽二千金爲贖不受喪還過貴州數百人爭昇之後兵部尙書李化龍敘川貴功贈秩京卿

閩書

道光舊志

蔡守愚字體言同安人第萬曆丙戌進士除南京祠祭主事與同舍湯顯祖等唱酬詩文益進改北工部屯田筦易州龍灣二廠故事炭直不以時給而惜薪司索例復不得以時納守愚時其給納商病以蘇內官至易州採礦守愚曰州本無礦民方上供朝廷炭課益以採辦必且逃亡將抗疏

論之事遂寢遷郎中出爲四川按察副使分巡上川土酋肆掠播州尤甚討平之歷擢至右布政皆在四川會雲南弗靖命守愚以原官駐建昌建昌袤三千餘里五衛八所綦布狃裸番焚聞土婦瞿繼良與夫弟馬應龍爭印仇殺授計遊擊吳文傑直入其帥內持印出叔嫂咸聽命蘭州土婦奢氏爭權留印土目簸弄其閒縛首惡事乃定採木役興疏言在川南則無木難無帑難在建昌則募夫難入山難出水難又請司帑先給三分之一而以建昌之杉易重慶之楠兩地交便調雲南左布政方候代而大帥侯某移鎮越備欲擒黠酋烏撒以爲功守愚曰是未可輕也亟馳止之帥不聽烏撒果合諸夷爲拒道路梗塞守愚撫諭之得無事初上官安世陞爲那固所欲妻祿氏糾夷報復求管專而陰欲嗣其姪祿祈守愚責以大義俾遂祈而立安世業烏斯藏入貢生事朝議絕不與迺而各番求復不已守愚言川省三萬茶引亦惟番貿易通行今關門一閉無論茶法爲阻卽軍需且歲增數萬如其言復之自楊應龍陷綦江後士民日請大征而

當事日議鵬勦然地勢孤懸兵餉難措守愚謂宜繕儲蓄討軍實以防與撫爲持久計巡撫彭某中以考功法遂歸

國書道光舊志

王志遠字而近漳浦人萬曆己丑進士授澧州知州歷擢戶部郎中持正不阿凡省金錢數百萬中使有徵求者抗疏爭之屢干帝怒九載不徙官乞改南京禮部郎中除湖南參政時民苦宗祿京緡監稅南兌諸弊志遠嚴剔之捕岷府用事人匿王府者械戍之髡其兩校尉王震棟楚人稱快就遷按察使擢四川右布政使罷坐稅及鹽茶稅歲五萬有奇轉江西左布政告歸三年起補河南會遼師潰朝議四省募兵命下志遠以爲非計委曲調劑以紓民困比兵至京師軍容壯於他省光宗卽位轉廣西左布政議罷閩廣佐運海船令出船價移造近地民使之遼報類至日夜調兵餉以勞卒於官逾年弟志道列績於朝贈太常少卿志道字而宏萬曆癸丑進士除丹陽知縣天啓元年擢禮科給事中疏陳時弊言今日由旨屢宣羣臣輒疑非上意票擬已下閣臣外聞相傳爲內批疏已發抄或經月

未見題覆已閱歲或中外未見施行欲資議論而論議反多欲辨人才而人才愈混臣以爲當復祖宗舊制又厥衛日捕開謀致人心不寧請鎮以安靜及議三案爲高攀龍所駁謝病歸臣魏忠賢蓋逐攀龍等朝事大變志道遂與賈繼春徐景濂同召還擢太常少卿再擢右通政尋轉左皆不赴崇禎二年召爲大理右少卿再遷左副都御史修撰陳于泰疏陳時弊宣府監視中官王坤力詆之語侵首輔周延儒志道上言陛下差委內臣不過覈錢糧兵馬物料而已原非假以官評吏議也邇年以來參疏日上論劾漸廣內則糾科道六曹卿貳外則糾方面督撫今則糾及輔臣矣此臣所謂越職也夫國家之設輔臣不但責之以參贊廷議也宮中府中陟罰臧否皆其職掌若使內臣糾劾侵權浸淫乎口含天憲手持朝綱而輔臣尙不問則將焉用彼誦臣哉臣仰見陛下天地之心內臣外臣原自一視至公也近來內臣所糾輒蒙報可其糾內臣者不見一行輔臣何不舉而一體言之今建言者與被言者爭下法司下詔獄如馬思理高倬王忠

之得失漸莫敢言南北之水火構鬪已極固廷臣之患亦非內臣之利雖然猶可言也士氣易激亦易靡名義易爭勢利亦易合台則口角且化爲種種不可言也帝怒責令回奏志道奏上言治兵惟擇將若內臣監督則魚朝恩出觀軍容即李鄆不能成功帝曰廷臣於國家大計不之言惟因內臣在鎮不利奸弊乃借坤疏要挾朝廷誠巧佞也詰責久之竟削其籍福王禛渡南京起刑部右侍郎明年改吏部南京敗唐王立起故官再疏辭以老病致仕歸踰年四月卒年七十三

道南原委明史

林堯俞字谷伯莆田人父煊章字繼照萬曆癸酉舉人歷永平同知有撫定南兵功遷刑部員外郎出爲湖廣按察司僉事播州土酋作亂劾兵轉饒復以功蒙賞資堯俞第萬曆己丑進士改庶吉士授檢討在翰林潛心大業十年始遣贊善尋丁母憂家居八年起補原官明年轉諭德兼侍講遷南京國子監祭酒尋乞歸嘉宗初特起禮部左侍郎管祭酒事疏辭不

允三年五月擢禮部尚書朝鮮廢其王肆而立其姪保堯俞言朝鮮廢立之事內外諸臣有謂宜聲罪致討者有謂勿遠討且受方其殺國末者或謂當責以大義察輿情之向背者或謂當令保堯討敵自洗者衆論或有可採其謂瑋實悖德保討叛臣以赤心奉朝廷者惟毛文龍一人耳陛下奉天討逆扶植綱常此正法也毋亦念彼素恭順迥異諸夷則更遣貞士信臣會同文龍再四詢訪助辦既明乃請聖斷報可尋加太子少保時選闈增額踰制堯俞力爭引祖制疏言願垂履霜之戒毋啓旁落之端便嬖惟供乎使令繼述允成乎人孝羣庸並驟之初魏忠賢治第求堯俞書扁弗應忠賢遂矯詔命書堯俞大書畏天堂三字題曰禮部尚書某奉旨書及奉旨會同選闈忠賢欲治故事上坐堯俞頤戒胥吏廣兩柱間虛其中忠賢至色慙堯俞徐曰公等原出本部選選安可一旦變論忠賢氣激乃均席罷去懷冲太子之誕忠賢與客氏謀詭秘幾危身居堯俞時申涓曉以古今順逆報應中宮始安忠賢痛用嚴禁李選侍堯俞疏爭不聽竟封選

侍爲康妃既而黨禍漸起五年屢疏乞休帝曰長尙書乃欲歸耶以堯俞
頥而長也賜之蟒玉加太子太保致仕踰年卒贈少保謚文簡堯俞習昭
代典章凡郊祀幸學殿陵寢冊號選婚實錄貢舉及宗藩四夷封貢諸大
典繹舊創新皆出其手釐然明備常從郊天熹宗步甚迅堯俞行遲不能
及帝屢回顧命羣瑄讓路其眷遇如此子銘鼎

銘鼎萬厯庚戌進士官湖廣左布政遷廣西蒼梧參政擢南京光祿寺少
卿終戶部右侍郎初授高郵知州時父堯俞誠之詩云始終慎一節佩服
比韋弦銘鼎厯官所至一遵父訓孫濬芳字公哲以祖蔭厯官梧州知府
道光舊志

戴士衡字章尹莆田人曾祖欽嘉靖十四年歲歉出積穀捐價市之二十
四年復大饑率第鏗治粥以賑遠近咸至以壽終葬之日甘露降墓所土
衡萬厯己丑進士知新建縣擢吏科給事中時方用兵朝鮮集水陸兵天
津以資應援士衡言河間州縣多棄地請人給五十畝畀牛種以耕一年

而罷餉三年而田可盡闢從之當關白之犯朝鮮也兵部尙書石星主封貢遣沈惟敬往于時倭擁樓船二百餘艘以接册使爲辭又小舟數十稱賈客往來近岸士衡曰此白衣搖櫓故智也上疏力言倭情必不可信封事必不可成惟敬市井無賴必不可任宜諭朝鮮亟修戰具增兵遼左以防其變因劾星誤國大罪五山東稅使陳增請假便宜得舉刺將吏淮揚魯保亦請節制有司士衡皆力爭之仁聖太后梓宮發引帝不親送士衡言母子至情送死大事奈何於內庭數武地斬一舉足勞今山陵竣事願陛下扶杖出迎神主庶少慰聖母之靈答臣民之望錦衣千戶鄭一麟奏開昌平礦銀士衡以地逼天壽山抗疏爭執皆不報二十五年疏言太子天下本本一搖則天下不安前承天語叮嚀一則曰父子至親一則曰兄弟有序炳如日星播揚海宇今天下萬口一詞皆曰陛下廢長立少牽於貴妃優柔隱忍甘以宗社爲戲不知天下者非陛下與貴妃之天下乃聖祖聖宗櫛風沐雨天之下也册立冠婚之大典禮非陛下與貴妃之典禮

乃聖祖聖宗詒謀燕翼之典禮也伏願早定元良之佐冠婚大禮次第舉行且言方今事勢不可知者三天意也人心也氣運也大可慮者五紀綱廢弛也戎狄侵陵也根本動搖也武備疏略也府藏殫竭也其切要而當亟正者一則君心也陛下高拱九重目不覩師保之容耳不聞丞弼之議美麗當前燕喃自佚卽欲殫聰明以計安社稷其道無由誠宜時御便殿召執政大臣講求化理則心清欲寡政事自修亦不報日本封事敗再劾星惟敬及楊方亨且列上防倭八事多議行俄劾南京工部尙書葉夢熊刑部侍郎呂坤薊遼總督孫鑛及通政參議李宜春時鑛已罷宜春自引歸坤亦以直諫去給事中劉道亨右坤力詆士衡謂其受大學士張位指士衡亦劾道亨與星同鄉爲星報復帝以言官互爭皆報寢尋劾罷文選郎中白所知帝惡吏部郎貶黜者二十二人因詰責吏科朋比士衡調外得蘄州判官無何詔改遠方乃授陝西鹽課副提舉未赴會憂危竝議起竟坐遣戍先是士衡再劾坤謂潛進閨範圖說結納宮闈因請舉册立冠

婚諸禮帝不悅至是有跋闈範名曰憂危竑議誣坤與貴妃從父鄭承恩及道亨所知等同盟結納羽翼貴妃子承恩大懼以坤道亨所知故與士衡有隙而全椒知縣樊玉衡方上疏言國本指斥貴妃承恩遂上疏力辨并奏士衡假造僞書中傷士類玉衡與其謀目爲二衡帝震怒夜半傳旨逮下詔獄拷訊比明命永成廉州玉衡雷州御史趙之翰復言是書王謀者張位奉行者士衡因斥位爲民士衡等更再赦皆不原四十五年士衡卒於戍所巡按御史田生金請脫其戍籍釋玉衡生還帝不許天啓中贈太僕少卿

明外史戴士衡傳

鄧原岳字汝高閩縣人萬曆壬辰進士尙書楊俊民器之語銓曹必以鄧進士與我原岳遂爲戶部主事監浙兌所部杭嘉湖三大郡精神恃權力多負緣竄改原岳一無所徇還朝督下糧廳主動戚中璫緹弁諸虞蘇衡量出入不失分毫奉命典粵東試所取多知名士擢雲南按察僉事領提學道日以交學行誼課諸生手註文選梓行以教後進行部考校雖退郡

僻邑前使所未到者無不窮歷名山勝跡題詠幾徧漢士望風咸奮稅墾
虐斂甚張無敢抗者其爪牙至笞辱諸生原岳捕治之囊以三木瑠遜謝
乃解恨原岳甚然無以中也平緬甸上功原岳以參籌策賜帑金晉湖廣
參議益屯田鹽筴水利敷道興廢起墜所至有治績賦予宗祿必如期諸
宗人亦德之三十二年秋有事棘闈賀逢聖文已黜落矣原岳搜得之遂
獲舉逢聖謁謝不納以督餉抵淮中道得疾竣事過里旬餘卒時已擢湖
廣副使不及聞矣原岳長身玉立美鬚髯人皆憚其方峻久與處溫夷閭
懌油然而可親詩以氣格勝與謝肇淛並稱於時

盧廷選字鉉卿莆田人萬曆壬辰進士除滄州知州時方經略朝鮮大軍
出於滄供億繹騷廷選馭應有方無敢譁者巨璫挾稅柄凌轅州縣廷選
從容語以民艱璫慚沮去歷工部郎中出知南昌府於府治東湖重造內
外闌墻築隄岸五百丈以杜侵占築章江隄周公隄以復前規又於豐城
仙壇瑠僧建石埽並條善後入議就遷右參政時議減宗祿廷選請以各

宗折額均惠於待封之子孫朝廷用其策諸藩悅服遂著為令尋中蜚語罷歸再起湖廣劇盜徐賓踰城剽巨室議者言盜伏城中當按戶大索廷選不謂然密遣邏他所果獲之卒於官方病中檄武昌府嚴察郡獄謂獄多滯囚勢將有變數日而難果作

金時舒字邦泰晉江人萬曆己丑進士授大理寺評事嘗雪一冤獄脫十人於死歷戶部郎中時礦議方興權璫所過輒斥辱有司福山知縣韋尚賢與沆中以危法時舒銳身救之得脫死人服其膽識出為鳳陽知府葺舍購史選五州十三縣俊父肄業其中士多奮起有知州為當事所憾中傷之時舒薦其稱職數往還力爭竟得釋無何以事與武弁爭坐罷起撫州不赴再起潮州有亂民擁眾沿劫海上累捕不獲時舒以計獲巨魁立散其黨紅毛寇潮州值霖雨城圯二十餘丈時舒支以木柵濬溝築壘為垣冒風雨宿城上有把總私與寇通計殺之絕其嚮導紅毛遂去擢文察副使尋乞歸

以上道光舊志

翁正春字兆震侯官人父興賢爲諸生精於易再中鄉試副榜除建陽訓導有妾婦子爲邑令筆且死興賢察其冤力白得解又請縣令蠲力役定埠直以蘇邑困遷延平府教授復移金山衛終浙江運判正春萬厯開爲龍溪教諭壬辰成進士擢第一人授修撰奉使冊封周藩厯中允庶子擢少詹事兼侍讀學士三十八年拜禮部左侍郎是時帝高拱在內大僚少所進用正春以貳長且直講闡日則戴星治文書暮則篝燈草講牘沈思隱諷其於治忽邪正之辨尤切十一月朔日食正春上言日者衆陽之宗仲冬於卦爲復乃極陰生陽之候有此虧蝕其變尤甚臣考萬厯三十年來八歲之間日食者三前兩歲爲四月朔純陽之月也今歲爲十一月朔又陽生之月也夫以純陽蝕陽旣受侵以陽生蝕陽益寢弱豈非陽德實虧故上天垂象乎陛下自萬厯二十年後財貨日斂聚人材日剝落旨意日留中至今已極矣一切請補大僚推考選起廢棄皆不省而橫征逮繫者不止天下不見陽和舒育之氣而冰凝之象獨堅夫日之食與更祇在

一時陛下之寢與行亦惟在一念誠鑒於此而翻然轉移則天變可挽矣
不報明年秋萬壽節獻入箴曰清君心遵祖訓振國紀信臣僚寶賢才謹
財用卹民命重邊防帝雖不能用然心善之吉王翊鑿請分支子常源爲
郡王正春言翊鑿之封在宗藩要例已定之後其支庶宜止本爵乃授鎮
國將軍王貴妃薨久不卜葬正春以爲言命偕中官往擇地得吉中官難
以煩費正春勃然曰貴妃誕育元良他日國母也奈何以天下儉乎奏上
報可代王二子爭立朝議以鼎渭長宜立下禮部正春曰庶均立長宜也
然訟父得立不順請以爵予鼎渭子而以前所立次子鼎莎爲將軍則父
子兄弟之倫皆盡咸以爲允琉球中山王入貢正春言中山已入於倭今
使臣多倭人貢物多倭器絕之便其中山土物則詔福建撫臣量留毋俾
入朝帝是之是時皇太子輟講已九年福王之國無期瑞王婚禮久不舉
廷臣章數上終不得命正春連上三疏其請開講曰東宮輟講已久控陳
愈切概置不問意臨御日久靜攝多年視天下事無一足爲吾急者遂并

天下大本之地子孫之計而亦緩之乎其何以對列聖慰四海臣民且天下亦多事矣元日風二日火官府釜鬻之刑朝紳水火之象間閭困敝內外交訂陛下聰明夫縱奈何於目前大事遲疑如此請之國曰藩封一事中外竭蹶以待乃吉期至今未定夫親王典禮有先時而備者有臨時而權者督之早民不能堪督之遲又恐一時貽誤今之國無期百司何以爲準請婚期曰高皇帝詔民男十六以上女十四以上許及時婚配況帝子天孫哉宜亟舉行上承聖母歡心下衍宗支大慶倘仍逾時不舉是於國家爲愆禮臣子爲瀆職臣所大懼也皆不報四十年進士鄒之麟分校鄉試私舉子童學賢爲御史馬孟禎所發正春議黜學賢謫之麟而不及主考官給事中趙興邦元詩教因劾正春徇私正春求去不許頃之言官發湯賓尹韓敬科場事正春坐敬不謹敬黨大恨詩教復劾正春正春疏辯益求去帝雖慰留然自是不安其位四十一年四月改吏部掌詹事府以侍養歸天啓元年起禮部尚書協理詹事府事上疏論魏忠賢有旨切責

明年御史袁鯨復論正春呈身門戶爲東林巨魁正春再疏乞歸帝以正春嘗爲皇祖講官特加太子少保賜敕馳傳蓋異數也時正春年七十母百歲率子孫奉觴上壽鄉閭豔之未幾卒崇禎初謚文簡正春在禮部最久職舉政修風度峻肅終日無狎語爲文瞻麗典重有冠裳佩玉之度明一代科目由職官廷對者二人曹鼎以典史正春以教諭云 闕書明外史

謝肇淛字在杭長樂人汝韶子萬厯壬辰進士除湖州推官改東昌厯南京刑部主事兵部郎中補北工部屯田司值大旱疏陳冗費諸弊數千言略言不忍以閭閻有限之膏脂付諸闍豎狙獍之手語甚愷切神宗優旨答之視河張秋作北河紀略具載河流源委及厯代治河利病曰吾以盡河之變也福王之國舟千二百有奇肇淛操小艇前驅繕濬多方水道無阻衆以不譁出爲雲南參政遷廣西右布政使安民亂鄰境告警肇淛置官增戍繕備益兵及增鹽引急宗祿抑土司服徭徭鑄錢征商具有實畫嘗言從來吏治之壞無如今日大抵官不留意政事一切付之胥曹而胥

曹之所奉行者不過已往之舊牘歷年之成規不敢分毫踰越而上之人既以是責下下之人亦不得不以故事虛文應之一有不應則上之胥曹又乘隙而繩以法矣故郡縣之吏宵旦竭誠惟日不足而吏治卒以不振者職此之由也又言國家立法太嚴如戶部官不許蘇松江浙人爲之以其地賦稅多恐飛詭爲姦也然弊孔蠹竇皆由吏胥堂司官遷轉不常何知之有今戶部十三司吏胥皆紹興人可謂目察秋毫而不見其睫者矣肇洙好讀書於學無不窺爲文豐腴軒霽詩靚深婉麗時罕其倫蚤年卽傳市江左大都率循古法而中有特造孤詣體無不備變無不盡蓄藻於建安希躅於少陵泛駕於長慶旣美才情尤深寄興是時詩道向衰以肇洙爲砥柱云

閩書池北偶談閩小紀

李叔元字端和一字贊字晉江人萬曆壬辰進士授戶部主事有巨璫籍沒波及宗信伯奉旨逮問叔元知其冤不事拷訊邏者以聞帝默然後果以虛誣赦免命慮囚江北多平反擢禮部儀制員外郎陳册立冠婚國本

諸疏凡二十上遷郎中時議給鑄權礦諸內璫關防叔元力持之帝不聽卒鑄給叔元封識完密奏請不許沿途私拆地方賴以肅然尋告歸久之卽家起山東提學副使歷擢湖廣左布政值四川雲南貴州三省弗靖羽檄旁午轉輸騷動楚人以派夫擾累將激變叔元馳疏得旨免派計一百五十餘萬金衆始戢有巡按與大獄羅織無辜叔元力爲辨雪尋乞致仕崇禎初起光祿寺卿堯太僕寺卿旋以方正不合罷歸叔元歷仕四朝宦橐蕭然家居能爲里閭捍患卒贈刑部侍郎

林學曾字志唯晉江人祖文明字坦齋爲諸生受易於郭文博得蔡清之傳父敦忠字恕甫八歲母卒權厝叢祠每朔望輒省視哀哭如成人長爲諸生舉止不苟同學生日爲有道先生郡推官聞其名延爲子師邑有二豪構者其一挾重賄浼居閒峻拒之以歲貢生授南陵訓導歷海澄教諭興化教授二序並祀名宦學曾第萬歷壬辰進士爲南康推官以清慎著稱其後李應昇爲推官民服其公廉民爲之謠曰前林後李清和無比歷

考功郎中疏陳東南水患乞遠法唐堯遇災思警亟簡賢才共濟時艱累遷左通政引病乞歸天啓中起爲太常卿轉南京戶部侍郎致仕撫按特疏於朝略言學曾年踰八十猶朝夕講誦不輟學者羣然宗之以比蔡清學曾居官時所至以趙抃像自隨苟直請託望風而卻神宗每呼曰林秀才其以清白受知如此

蘇茂相字宏家晉江人士潤從子萬厯壬辰進士授戶部主事自上疏請朝講奉使過山東見饑民以賑卹請人疑其出位茂相曰饑渴由已豈與人任耶權九江關稅額外無溢取商人德之出知彰德府俗喜格鬪刊邵雍孝弟歌曉勸之趙濟祿入多不時往往與知府閔茂相悉用邑解原封先時分給宗人誦其義權江西按察副使累進太僕少卿馬政一新光宗卽位權兼都御史巡撫浙江疏請減免織造停差織監言杭州火災浙東西水旱請免加派並發倉賑濟又新派袍緞五萬七千五百餘匹需銀一百萬有奇請分爲二十運其每年春秋二運並酌留雜款銀以紓民皆時

政之要會遼東撫臣王化貞以邊事急奏調浙江陸兵一萬又調水兵八千而台州水兵王元尤成者以駿糧故毀總哨秦階署擁入郡城焚屋放囚茂相疏黜大帥王良相參將楊維垣而密授計副使張師繹擒梟之寧波兵陸敬趙鳳所過勒犒數倍至壩上與新兵競擠溺水者五人茂相曰俟其登舟乃聲其罪捕敬鳳二人梟示諸兵聞之股栗迄至京無敢犯者昌國哨官蔣良忠逐哨總王翼嚇其兵樹幟以保賢能爲名而拒代者施應奎或言宜暫許之茂相曰如此則唐卒自立留後之勢成矣檄副帥張可大之昌國觀變而令團練楊慈忠出不意縛良忠杖殺之代者始得入海中地曰南麂者閩浙界也閩浙人通倭以數萬窟穴其中寇王鍾王錦等給印票質人取贖官兵追勦則遁茂相與巡道賈充元督勦凡三戰殺賊渠老公等數十人嚴禁奸人接濟寇糧賈鍾等窘乞降因使立功自贖擒珍他寇沿海悉平擢兩淮巡撫進兵部侍郎將移鎮適妖賊葉朗生者湖州人妖醫馬文元弟子也聚黨舉事以攻山東白蓮賊爲名徑於郡城

中索豪富家買命錢居民悉駭竄茂相聞報檄水兵乘夜掩捕文元逃松江馳檄江南合兵捕獲之吳越底定乃移鎮兩淮遷南京刑部侍郎兼督漕運揚州揚州老庫金久不會計中官借備大工名搜括二百餘萬茂相僅發閒款銀二十餘萬又借正餉十萬而每季扣除之奸弁劉魁乘寧遠急持撫咨取淮餉六千緡茂相曰遼中丞暮春四日受事望日始加巡撫而咨署朔日贖也且篆文不類條十疑鞠之立伏罪人稱神明鳳泗爲湯沐陵寢重地水旱蝗相繼茂相下令通商平糶復力爲海徐桃源贛榆諸州縣請得改折民賴之崇禎初入爲戶部尙書督倉場與督漕事權相表裏其時添設督餉部臣於天津其人墨而狡輒借遼警以截漕爲辭而以帶運遼糧抵補蓋奸旗有大蠹四米旣侵盜無可入倉一也漕糧入倉累經覈曬爲費不貲而遼糧例不簸揚二也遼糧例無尖耗而漕糧每石外有耗米七升尖米四升二合一截則皆入其橐三也天津募舟往遼一舟輒二百金四百舟則八萬矣旣誑米復誑金而齎一空單以折色授受爲

官爲軍皆驟飽四也茂相洞悉其弊累疏以職掌力爭帝亦明知之而不能盡用也京軍月糧額放折色兩月部臣緣內璫劉應坤請遂欲少放折色一月茂相復力爭謂太倉升合非溯江渡河不能入庾多放一月本色二十八萬倉廩益虛請勅計臣恪守祖制復疏言錦衣衛官旗糧萬厯末僅萬七千餘石自逆璫與田爾耕亂政增至三萬六千餘石文恩院匠官册載僅七百餘名今三千餘名歲多支米二十五萬石鴻臚寺帶俸序班册載僅百七十三員今五百二十七員歲費俸米四千石有奇官俸非漕糧比外解蘇松常三府三萬餘石耳且册中如魏田客桂皆奸黨清法當不俟終日帝皆力行之尋改刑部手定逆黨爰書請戮魏忠賢客氏尸忠賢姪良卿客氏子侯國興俱決不待斬戍有差遂除錦衣刑具天下快之李承恩寧安大長公主子也以擅用龍袍龍盒爲僕人所首問斬茂相謂據律僭用違禁龍鳳紋杖一百徒三年卽使承恩不在八議之條亦無死法況世廟親甥乎得改徒時帝召對大臣使各陳所見茂相言刑官舊爲

清曹稱西翰如王守仁何喬新王世貞輩多爲名臣近選人趨羶途爭避刑部其視刑部甚輕故屬官少振作者宜做成化閒尙書董方言令本部辦事進各司問刑均選有才品者而尤以防內侍預政及蠲租飭邊爲第一義皆得溫旨加太子太傅旌以老病乞致仕賜馳驛歸卒賜祭葬茂相恬靜謹凜藏才不露其撫浙率皆防患未然陰全數百萬生靈而人不知請褒贈方孝孺錄其子孫又請卹知府吳寶秀並妻陳氏尤維持名教云弟茂杓自有傳

史繼偕字世程晉江人父朝宜自有傳繼偕第萬厯壬辰進士第二人授編修與同官疏請冊立東宮出閣講學不報奉詔使廣西蠲軍興諸賦厯推至南京吏部侍郎署尙書事兼戶禮工三部力清積弊辛亥考察與署都察院丁賓稽覈不少貸怡神殿災會諸臣同疏時事復疏言目前政務孰過京察軍政二事不報四十年以戶部主事賀世壽風聞指摘乞致仕先是南京御史周達疏論徐縉芳等附會東林排擯異己世壽疏駁之謂

達疏本御史徐兆魁兆魁又本繼偕繼偕謀接輔臣李廷機之脈授意轉
論除不附已者且誣繼偕子海上掠貨爲謀大拜地帝知其謬不問而繼
偕不自安再疏乞歸改禮部侍郎協理詹事府而繼偕已去舟次燕子磯
御史魏雲中復疏論繼偕前經世壽彈論不宜復改清華蓋忌繼偕轉北
不知其已請告也抵家再乞辭并請罷斥時廷推閣臣吏部尙書趙煥方
舉繼偕以御史翁憲祥言不果於是南北言官吳亮嗣等各發憤不平疏
劾繼偕南察至公比趙煥以湯兆京爭年例去繼者迫於公論乃推繼偕
吏部右侍郎兼翰林院侍讀學士三辭不允始至京視事仍兼掌尙書事
既而煥復入四十六年與煥考察朝覲官徵周官六計訓廉爲主遼陽告
急帝方稱疾不出繼偕會廷臣疏請視朝并力陳備兵措餉諸疏不報明
年再疏乞休移近郊寺以明必行帝遣官諭留既而卽寺拜疏辭朝卽日
南發光宗卽位晉禮部尙書兼東閣大學士預機務天啟元年三月就道
至涿州聞御史劉芳論列遂疏病乞歸有旨促趨朝戶部郎阮大鍼復追

論其考選科道時蔽賢罪芳大鉞俱罰俸十月入閣甫閱月以延緩捷加太子太保文淵閣大學士蔭一子入監二年命繼偕與葉向高等總裁神宗光宗兩朝實錄刑部尙書王紀罷斥繼偕與向高何俊彥論救皆不聽三年正月晉太子太師大鉞論遼事及泉州一錢會謂繼偕子主盟語極醜詆繼偕疏辨且請勅撫按覈實帝溫旨慰之而是時一唱羣和刑部郎解學龍御史練國章等攻擊愈力繼偕連疏乞免至十八上乃允七月加少保蔭一子中書舍人行人護送馳驛歸光宗實錄成復加少傅再蔭一子入監讀書崇禎二年以奢崇明蕩平卽家加少師兼太子太師年七十五卒諡文簡賜祭葬案前志於入闕辦事下言神宗稱疾不出繼偕曾廷臣請視朝云云又言熹宗卽位復召入闕云云考繼偕爲相未實再入蓋繼偕之相廷推於萬曆四十七年至明年八月弟繼光宗卽位始命入闕又明年爲天啟元年十月乃至實止一事也弟繼倬強學無他嗜母卒治墓躬負畚鍤繼倫字世敘官湖廣按察司照磨武昌舊有魚課故事府倅督之藩司以屬繼倫卻其羨餘遷廣東碣石衛經歷繼佃字世稷諸生工詩子廷昂字夫東爲諸生有文名元工詩草書道

勁傾倒一時卒年三十五

郭長發惠安人萬歷甲午舉人授龍溪教諭天啟初累遷戶部員外郎遼左失事上書輔臣爲恢復計出完徐州倉妖賊起山東勢且及徐長發親詣荆山口激厲材官輦米傳煊併力守禦賊從固臺堡暗度長發傾私橐邀援遼將士過徐者併力禦之賊敗走城以完州人德焉以大計被中後論守徐功復原官而長發已卒

洪啟睿字爾介南安人萬歷壬辰進士授禮部主事首發沈惟敬之奸及兵部尙書石星誤國宋應昌等扶同欺蔽狀復請册立東宮詞甚激切署儀制司時大璫以封爵爲請啟睿不允璫銜之及璫敗始遷祠祭郎中擢浙江按察司副使領提學道按察使備兵海上著功績寧波人祠祀之就遷布政使屬浙東饑浙西澇啟睿殫力請蠲賑又請折色咸報可尋乞休洪揚字廷掄同安人儒儻有大志萬歷閒從父北遊天津咨詢邊事多所聞見已借其兄遊雷州兄爲副總兵楊應春幕客而揚充紀功官屢有征

黎之役揚受應春命入刀港德霞諸洞委曲撫諭黎人悅服滿揚出見應春受賞去傳檄告鄰部就撫日至而參將張萬紀欲乘黎不備立奇功實夜進勦黎覺之伏林箐以伺弩矢兩注師殲焉揚恨爲萬紀所賣氣激暴殞黎人爲歸其櫬

陳鳴華字誠甫晉江人父安字叔勉萬厯開歲貢任靖江訓導厯尤溪教諭台州教授台州人肖像祠之以國子監典籍乞歸執父喪水漿不入口斷葷酒者三年友人趙生陷於倭爲捐貲贖焉鳴華登萬厯丙戌進士授戶部主事權九江關稽覈蠹弊稅加額而商不病尋督永平餉申明客兵之擾請撤之士民立石以頌厯禮部郎中選廣東按察司僉事陞湖廣參議值漢水泛溢度形勢增隄堰民免於患楚宗人歐殺巡撫趙可懷命鳴華與按察使定其獄以事關天潢網不宜太密釋株連二十餘人尋遣副使告歸年八十一卒從弟鳴熙

鳴熙字緝甫萬厯己卯舉人授九江通判郡接楚壤民潛掠人過江賣之

鳴熙偵捕無漏者擢知欽州未上移回原再移無為州州為江北劇地值霖雨大作圩岸盡圯水及雉堞鳴熙禱天願以身當之水勢頓減民無恙乃大發金錢築壩按地形覘河脈廢寢食者數旬乃成三壩民永賴焉署右有宋米芾寶晉齋墨池適弟兵部郎中鳴烈奉使過稅駕池上命酒賦詩州人以比逍遙堂遷雷州同知卒於官

林棟字隆甫德化人父濟以歲貢生入國子監歸卒於邵州棟方童穉爾翁迎喪歸葬萬厯中貢入太學除廣州府三水縣丞遷樂會知縣值倭寇猖獗抗守孤城設奇布伏巨魁殲焉當道妄殺要功棟釋貧民千餘以抗忤被逮尋得白改荆府審理不赴

以上道光舊志

連繼芳字以善龍巖人父一實邑諸生嘗分田六百畝以贖族人當事為建尚義坊旌之繼芳萬厯壬辰進士授德清知縣不為操切之行以不善事上官改州同遷廣西按察僉事分巡右江道時交趾及烏蠻侵擾奉敕征討屢戰克捷積寇以平南寧潯州諸郡咸勒碑紀德乞終養歸年七十

卒初繼芳遷謫後浮沈者三十年夷然安之早夜殫精任事無挫顛憲成
贈以文曰人往往以境轉我弛然自廢公能以我轉境抑而愈振不爲憂
患摧志必不爲安樂肆志也 閩書龍巖縣志

王約字伯一惠安人祖奇橙字良實正德丁卯舉人石首教諭嚴條教勤
訓誨擢益陽知縣出格招捕洞庭湖劇盜盜率徒黨數百伏庭下願爲良
民未幾卒囊橐蕭然巡撫檄郡縣資之乃歸喪約登萬厯丁丑進士除行
人有廉聲秩滿遷戶部主事轉餉昌平督兌江西悉心清釐出知惠州府
辨冤獄郡稱神明移瓊州郡有牛稅歲入可二千金約除罷之曰太守乃
牛僧耶先是郡推官署府事庫藏虧約至執主藏吏因爲推官所中調平
樂值徭夷擾邊繕城備糗製火器就擢按察副使備兵左江兼轄右江土
酋韋文燦爭襲相仇殺當事議勦約不可諭之遂止安南爭國求啓闕奉
貢譯人私語約公但受其貢物主國事者定矣約曰天朝所重者名義社
關力卻之遷參政致仕 道光舊志